

四庫全書

史部

欽定四庫全書

史部

浙江通志卷一百八十四
五

詳校官給事中臣戴璐

檢討臣德生覆勘

總校官編修臣倉聖脉

校對官中書臣吳甸華

謄錄監生臣沈浩

欽定四庫全書

浙江通志卷一百八十四

人物

孝友

湖州府

漢

許頤

西吳里語故鄉人父患惡疾醫曰啖人肉可差

其門

晉

王談

晉書本傳吳興烏程人年十歲父為隣人竇度

所殺談陰有復讐志而懼為度所疑寸刃不畜
日夜伺度未得至年十八乃密市利鋤陽若耕鋤
者度常乘船出入經一橋下談伺度行還伏草中
度既過談於橋上以鋤斬之應手而死歸罪有司
太守孔巖義其孝勇列上宥之元興三年舉孝廉
不應召
終於家

南北朝

錢延慶

宋書孫棘傳泰始二年長城吳慶恩殺同縣
錢仲期仲期子延慶屬役在都聞父死馳還

於庾滿埭逢慶恩手刃殺之自繫烏
程獄吳興太守郗顯表不加罪許之

孫法宗

南史本傳一名宗之吳興人父隨孫恩入海

逆至十六方得還單身勤苦葬送母兄儉而有禮以父屍不測入海尋求問世間論是至親以血漉骨當悲漬浸乃操刀沿海見枯骨則刻肉灌血十餘年臂脛無完皮血脉枯竭終不能逢遂哀經終身常居墓所山禽野獸皆悲馴附宋孝武初揚州辟為文學從事不就卒

王文殊

南史本傳字令章吳興故鄣人父沒魏思慕泣血終身蔬食服麻不婚不交人物吳興太

守謝淪聘為功曹不就立小屋於縣西歲時伏臘月朝十五北望長悲如此三十餘年太守孔瑋之表其行詔榜門改

所居為孝行里

丘傑

南史本傳字偉時吳興烏程人年十四遭喪以熟菜有味不嘗於口歲餘忽夢母曰死生自分

別耳何事乃爾荼苦汝嗽生萊遇暇墓毒靈牀前
有三九藥可取服之餘驚起果得甌中藥服之下

科斗子數升邱

氏世保此甌

沈文叔

南史沈慶之傳慶之吳興武康人長子文叔
位侍中慶之之死也不肯飲藥彼之以被掩

殺之文叔密取藥藏錄或勸文叔逃避文叔見帝
斷截江夏王義恭支體應奔亡之日帝怒容致義

恭之變乃飲藥自殺文叔子昭明位秘書郎聞父

死曰何忍獨生亦自縊死昭明弟昭光聞收兵至

家人勸逃去昭光不忍捨母入執母手悲泣遂見

殺時昭明子曇亮已得逃去聞昭光死乃曰家門

屠滅獨生何為又絕吭而

死時人嘆其累世孝義

潘綜

宋書本傳吳興烏程人孫恩之亂綜與父驃共
走避賊驃年老行遲賊轉逼驃語綜我不能去

汝走可脫幸勿俱死驟困之坐地綜迎賊叩頭曰
久年老乞賜生命賊至驟亦請賊曰兒年少自能
走今為老子不去老子不惜死乞活此兒賊因斫
驟綜抱父於膝下賊斫綜頭面凡四創當時悶絕
有一賊從旁來相謂曰此兒以死救父云何可殺
殺孝子不祥賊良久乃止父子並得免太守王韶
之臨郡綜與吳達並察孝廉元嘉四年
有司奏改其里為純孝里蠲租布三世

吳達

宋書本傳吳興烏程人經荒饑饉繼以疾疫父

母兄嫂及羣從男女死者十三人惟達夫妻獲
全家徒四壁冬無被緣晝則傭賃夜則伐木燒磚
無有懈倦夜行遇虎虎輒下道避之期年成七墓
葬十三棺鄰里嘉其志義葬日悉出赴助達一無
所受太守王韶之擢補功曹史辭不就舉為孝廉
晉王韶之贈潘綜吳達舉孝廉詩仁義伊在惟吳
與潘心積純孝事著艱難投死如歸淑聞若蘭吳

實履仁心力皆殫固此苦節易
欲歲寒霜雪雖厚松柏九丸

沈顗

南史沈演之傳顗吳興武康人字處默清靜有
至行慕黃叔度徐孺子之為人內行甚修事母

兄孝友兄昂以家貧仕為始安令兄弟不能分離
相隨之任及昂卒逢齊末兵亂與家人并日而食
樵採自資怡然不改其樂

聞人賈

南史韓係伯傳吳興人聞人賈年十七結
客報父仇為高帝所賞位至長水校尉

朱文濟

南史解叔謙傳文濟字敬達吳興人自
賣以葬母太守謝淪命為儒林不就

于敷

嘉靖安吉州志少失母年十歲求母遺物惟得
一畫扇乃織籠之每至感思輒開篋涕泗好讀

書能屬文齊高祖見而奇
之以為世子中軍參軍

沈崇僚

梁書本傳字思整吳興武康人父懷明宋兗州刺史崇僚六歲丁父憂哭踊過禮及長傭

書以養母齊建武初起家為奉朝請永元末還司徒行參軍天監初為前軍鄱陽王參軍事三年太守柳惔辟為主簿崇僚徒惔到郡還迎其母母卒崇僚以不及侍疾將欲致死水漿不入口晝夜號哭旬日殆將絕氣兄弟謂之曰殯葬未申遽自毀滅非全孝之道也崇僚之瘞所不避雨雪倚墳哀慟每夜恒有猛獸來望之有聲狀如歎息者家貧無以遷窆乃行乞經年始獲葬焉既而廬於墓側自以初行喪禮不備葬後更治服三年久食麥屑不啖鹽酢坐臥於單薦因虛腫不能起高祖聞擢補太子洗馬辭不受經年乃為永寧令自以祿不及養怛恨愈甚哀思不自堪至縣卒時年三十九

唐

沈嶠

弘治湖州府志烏程人父卒廬墓六年不櫛不沐醢醬不入口哭則嘔血刺血書經年三十卒

董滿

崇禎長興縣志天寶三年父亡廬墓生芝九莖大中元年表其鄉曰嘉瑞

于元損

西吳里語烏程人父母卒廬墓四十年廬側生芝草九莖武后詔旌其門

沈景筠

續文獻通考烏程人性至孝母懼雷及卒葬宅西每雷鳴則奔墓所號哭云某在此賀知

章為作
孝德傳

陳承堅

西吳里語吳興人年九歲大中三年母亡葬後廬墓所墓前生芝草三莖詔旌其門

石昂

吳興掌故純孝嶺絕壁削立黃巢之亂邑人石昂負母避於此

宋

曹清

弘治湖州府志烏程人其父嘗殺人繫獄清痛父不可脫乃自誣曰是吾手也非父罪於是

代受重辟後屍汴流至家葬烏程之西陽村今春秋奉祀號曹孝子祠

朱泰

墨客揮犀武康人事母孝嘗為虎所搏負之而去泰大呼曰虎暴殺我我母將無所依虎遽棄

於地驚竄入山後安健如故鄉里號為朱虎殘

沈氏子

德清縣志失其名縣之金鷺鄉人宋世居勾壘家貧養母以孝聞母病亟割心肉一嚙為

療以進病竟愈知縣章丞識嘉其孝行特名其里曰慈孝

朱天錫

弘治湖州府志歸安人父嗣發仕至朝奉郎天錫好義敬愛老幼見貧乏者濟惠之父喪

哭泣過禮既葬廬墓三年有司以聞旌表門閭後仕至諸暨州判官

曾雪之

烏程縣志寶祐間父獲罪當刑雪之代父死上聞追封之武康人慕其孝立廟於縣南曰

靈祐昭

應廟

吳可幾

明一統志安吉人好古博雅與弟知幾同登景祐間進士可幾仕至太常少卿知幾為郎

官守其父屯田墓三年

平地出泉時號孝子泉

元

趙本道

沈貞趙本道傳字中立長興人少失母事父以孝聞歲乙未有強寇壓境據其父本道號

泣隨之跪告寇曰吾父病痿而瘠又貧宴無以賄賂願以身丐父之生寇愈肆狼欲手刃厥父本道

奮身捍之卒遇

害而其父獲免

明

朱允恭

西吳里語烏程人父華洪武十八年以老人除監察御史二十三年以事繫獄允恭上疏

中父寬帝念其孝命代父為御史仍宥父罪人稱孝子朱御史

張淵

明詩綜傳字子靜歸安人母失明朝夕舐之父好飲醉或罵詈則握髻請解長跪移時晚遊四

方與沈啓南史明古僧月舟最善湖州勞太守錢修府志出其手筆

馮添孫

弘治湖州府志歸安人早孤奉母惟謹未幾間居金陵母病歷延諸醫無效添孫稽顙北

辰哀哭乞母壽猶未愈一夕沐浴割肝和粥進母母食而愈有司上其事詔旌其門後官至工部侍郎

沈康

弘治湖州府志字士寧歸安人號雪月敦內行

愈父喪

值隆冬袒括徒跣日夜哀號鄰人葉姓者

素強悍

聞康哭之慟亦為改容既而母卒哀毀亦

如之寢苦

枕塊前後居喪次六載尤究心於禮著

延壽錄

一冊以警世郡邑尚其賢每鄉飲延致三

賓之席後

以無

疾終壽

八十一

長興孝子

耿定向二孝子傳迨其名氏其一居浙之

其從父

羸於貧一日飲諸嫗呼孝子侍嫗多豪貴

人饌具

映甚孝子未及舉即私念曰何緣得致我

母前耶

時時目左右盼每視賓所不顧急摘諸甘

脆品裹

納袖中會燕閑酒酣主人出金卮飲貴客

容不勝

酒以卮置樓簷間覆以瓦先問歸能侍者

報亡其

卮衆欲自明請急歸戶令人袒檢之孝

子兩手捫袖中倉卒不得計即謬曰由我詰出之
則曰匿他所矣再詰之則又曰求諸所不得或為
他人乘也當卒償之詰辰從父責所償孝子願鬻
其屋且曰幸稍寬我懼傷母氏心無何貴客憶前
厄乃折簡主人語以故主人如言檢得之急呼孝
子至猶謬對如初從父曰吾已得厄矣若何苦自
誑孝子始吐實淚下曰某苦不能奉母氏而免女
態若此比諸貴客在設令把我袖將大詬我且重
為叔父羞故寧爾也從父大感悟乃召前坐上客
遍語曰是子如是忍與吾兒二視哉三分其產令
得終奉母氏焉其族里至今
多禮讓人謂遺風所漸云

吳人驥

黃汝亨吳叔良傳字叔良吳興人父太平公
以清特聞死官公嘗發里中盜置於法盜父

子為魁恨人骨乃集羣盜晚月下排戶入獲吳母
人驥倉皇奮身越垣牆赴救為同匿者環抱掙不

得前乃升屋大號賊怒發流矢中左右股又中偏頂墜地被血鏃旬旬抵母所賊皆露刃立人驥忍死前捍母令蜚搜筐中簪珥奉賊不能得賊益怒其餘黨復自外發勁矢中右脇會數者至賊去母幸無恙人驥越三日病創死嘉靖

庚申十月十五日也年二十有七

沈之章

烏程縣志嘉靖乙卯倭寇雙林掠其父思賢以去之章赴倭壘父將就刃之章悲號奮擲

願以身代倭俱釋之

沈賁

沈鼎

烏程縣志與兄晉同居有賊入室行劫晉逐之被殺移屍舟中欲載以去賁偕

鼎奮入賊舟奪還殯於堂因矢曰不獲賊報兄仇不復歸同出求賊踪跡無所得越半載泊舟後林與賊舟隣賊羨二人奪屍之義中夜述其事以告同黨二人聞其語待旦密告村人共執之送官論

死歸設祭
於兄告之

沈如松武康縣志字忠字母病膈取藥三橋歸至中
野遇雷震同行兩人眩而墜曰空中有人叱

云沈孝子不可擊持藥進母母病起巡按書旌
揚孝行四字扁其門嗣以明經司教嘉興縣學

張夢徵

湖州府志歸安人父組南京工部郎中方病
疽青陷作嘔逆皆惡症夢徵年十三姊錦繡

年十五傷父之危日夜謀活父夢徵吮疽得膿輒
燕展轉疽畔審視顏色錦繡焚香割臂肉一臠作
糜進父時正昏眩得粥覺甘美食既汗

瀉下遂漸瘥江右吳宣為作雙孝傳

董悌

見只編長興農家子年十三大母膝病為刲股
進疾遂起又十年復刲股療其母費延算至三

十年而復作費年八十餘病劇於前董居山南有
祠默禱於神以刀破腹左出肝剖二寸許於時肝

臟迸出以一手持肝一手障創口馳下山計二里許不少痛眩忽逢一閹豕人見其流血灑灑問之得其故急取索桑皮縫其創口血遂止用肝煮藥進費病遂起又三月始卒子世德以父喪痛之餘貧置不能致養賣其妻朱用供朝夕縣令熊得畧買一婦斷配之

潘振

歸安縣志字藻生崇禎庚午舉人性純孝痛父不及見捷書辛未不上公車廬墓三年天啓初

直指以孝子請旌力辭振為孝廉二十八載不通干謁子廣福順治辛卯舉人

董樵

崇禎長興縣志唐興山負薪人也母年七十患

心疾思肉食無能辦樵刈胃前肉熟而薦之疾以瘥諸生姚光佑聞於縣縣令熊明遇名詢之血痕故在遂月給米一石又與之妻山中人但呼曰

董樵

潘喬

烏程縣志字表元增廣生幼喪父事孀母孝折爨復將已產分給其姪撫之如子有疾弟被

訪將建喬以百口保之得免終未有一言也著有焚餘草

施新

嘉靖湖州府志歸安人弟震以催科殺人法應抵罪新念母愛所鍾以身當之會赦免

嚴有芑

歸安縣志字豐思年十六補博士弟子員父覺令居巢崇禎乙亥流寇破巢為賊所害有

芑以身蔽父屍號慟罵賊不已賊磔之肩臂俱斷猶怒目而視越三日始殮面色如生同時殉難死者有三孝子注一姓易一姓萬失記其名倘有芑為三焉

沈角

歸安縣志字麟弓孩提喪母六歲時焚母靈長號慟絕即抱母主躍入烈焰中左右驚掖之出

折其一股終身舉股念母淚出不止事繼母嚴至孝嚴沒一慟仆絕家人救之被嚙斷一指始甦

王家零

孝豐縣志割股廬墓墓前產靈芝數本人以為至孝所感

國朝

朱鼎

舊浙江通志字冠英長興人少失怙哀毀骨立事大母及母至孝撫諸弱弟備極恩勤祖姑父

三樞在殯祝融震鄉鼎抱輶號顓風焰頓息營窆山中忽遇虎奮袂前行虎旋斂跡及母歿合葬廬墓十年長興縣志巡撫朱昌祚表其門曰孝友

嚴廷瓚

戴級嚴孝子傳驥村人震直九世孫父遜修為姪某所殺廷瓚甫二齡母朱氏撫之稍長

泣述父冤死狀廷瓚泣血嚙指即蓄利刃自隨遷於雉城訓蒙養母或勸之婚以他故辭間歸故里且與警脰共飲食康熙己未春廷瓚一夕語刃曰我與若同寢食二十餘年蓋亦思用命乎乃作銘

舒聲晨起告母曰兒年二十有八矣父仇未報更
奚待號慟累日托辭歸里適春社演劇讐在倚伍
中乃拔腰間刀奮擊之中腦腦裂復斫其頸斃焉
遂棄刃入郡自首請就獄縣令嘉其志欲上聞宥
之未果竟
死獄中

嚴有毅

鄉賢留祀冊字既方歸安人崇禎癸酉副榜
父覺明末居鄞令死流寇之難有毅從亂離

中負骨歸葬躬自負土手指俱裂夜有虎至墓門
盤旋而去葬後廬墓三年所著有嗜退軒語存語
皆警
世

周國璠

題旌冊德清人父病顛天請代衣不解帶者
四十餘日及卒居喪盡禮廬墓三年雍正四

年具題
奉旌

陳子英

題旌冊字念齋烏程人十歲喪父哀毀如成人
事庶母克盡子職親不憚輒長跪請罪必

得歡心乃已雍正

四年具題奉旌

楊汝欽

題旌冊德清人年十六喪父家甚貧負土成墳每親親所嗜卽悲傷號泣事母善承色笑

母年八十一而卒廬墓三載始歸雍正六年具題奉旌

寧波府

漢

董黯

純德錄字叔達句章人江都相仲舒六世孫居湖之溪少孤力學事母黃氏惟謹母恙思大

隱溪水遠莫時致黯築室溪濱板輿就養疾瘳乃歸後斲土塼居傍進以奉母泉味如大隱僉謂孝

歲所致比隣王寄甚富縱酒無行其母與董母相
善謂董母曰我衣食頗足而瘠且弱汝不吾若而
肥且健何也曰吾雖貧黯孝心常泰而健耳王母
歸以喻其子冀其有所悔悟而寄反懷忿伺黯出
遂毆董母黯還而母卧床不知所為跪而言曰黯
不孝貽母之憂乎曰非也我失言致寄辱耳黯極
力祈療母竟不起哀毀負土營葬廬於墓側思復
大懃以寄母在未忍枕戈不言俟其母卒且終三
年喪手刃寄首祭於母墓自囚以告有司有司以
為抱義而行仁復讐而全法事聞和帝嘉其異行
遣考功郎邱霖賫詔釋專殺罪名拜為諫議大夫
累徵不就年八十終勅封孝子命即故居立祠靈
應廟西贈慈母賢淑夫人由是以慈名溪以溪署
縣云三國志虞翻曰句章董黯盡心色養喪致其
哀單身林野鳥獸歸懷怨親之辱
白日報讐海內聞名昭然先著

唐

張無擇

成化四明郡志無擇字君選慈溪人永隆初由進士舉明經刺火和州丁父叙憂奉喪歸

里三年不薨七日絕漿都督竇懷正聞於朝屬神龍初國家多事未遂旌表服禪辭祿廬墓以壽終

宋嘉定十四年邑令趙崇附祠於董孝子廟之東馬樓鎬董孝子廟記唐神龍中有張孝子無擇父

墓在慈溪之虎脾山結廬負土有

湧泉芝草之異仕至和州刺史

宋

楊慶

宋史本傳鄞人父病貧不能召醫迺剗股肉啖之良已後母病不能食慶取右乳焚之以灰和

藥進焉人口遂差久之乳復生紹興十三年詔表其門

張超

延祐四明志昌國縣人年十九父縈患氣疾寢

篤懇侍無牧超乃封脅取肝煮粥以進不踰日

父病愈乾道二年十二月守趙伯圭舉楊慶例命

孫之翰

延祐四明志字文舉慈溪金川鄉雞鳴山人

母疾草封體取肝為粥以進越夕母如醉自

吳璿

延祐四明志定海人父璋以邊功補副尉璋妻

宋氏病璿封股療之而愈年九十三乃終璿與

妻楊氏更病男安禮安時皆封股以淮安禮療其

縣令王自揆建

崇孝門以旌之

浙江通志

表鎮

嘉靖寧波府志奉化人事親奉養備至端平初父年七十病羸醫禱弗效乃一再封股和藥以

進父病垂絕復存者十五年異母兄有虐之者友事益謹孝弟之稱無間戴表元為作遷柩記以表

其行

陶椿卿

嘉靖定海縣志字均壽以禮經魁宋末癸酉覆試又魁父回孫登咸淳進士倅平江府卒

椿卿廬墓終身元初被選舉力辭不赴鄉邦異之

元

夏永慶

戴良夏孝子詩序字章甫定海人父文德大德中轉粟以供京師浮海而北舟至海津鎮

溺焉永慶倉皇號救躍入洪波載其父以出文德得不死永慶以力竭沉水舟人求之弗獲人皆驚

嘆稱曰夏孝子厥後三弟痛其兄之死孝也益以孝義維其家居同室食同爨有司上於朝旌其門

曰孝義之門

陳汝楫

嘉靖寧波府志字傳巖象山親歿未葬那家失火將及與妻徐氏伏柩號慟誓不獨存

既而風返火熄柩獲全人皆謂孝感弟汝舟疾且死以幼子為托汝楫泣曰而子即吾子忍異視耶汝舟死育其子長為娶婦以其遺物畀之

唐轅

唐轅

續文獻通考鄞人父復禮以匿官嶮事被陷拘以歸京師轅詣史代父命叩頭

流血吏問其請脫父桎梏之行至越州轅自抗回遇諸塗請代兄行轅不從轅曰兄訥於言往必不免弟有一計可生竟奪其桎加已手吏亦閔而從之轅抵京繫獄旬日近臣奏其罪得免

華韶

嘉靖寧波府志鄞人生未辟父亡母沈氏家貧不能自存父母欲奪其志誓死弗許勤紡績以

教育其子後病亟昭尚幼到左股和藥以進母愈至正十年尹許廣大書節孝字以表其閭

史懋祖

陳基史孝子傳字時可鄞人新昌主簿賀之孫公麟之子懋祖甫三歲而母卒未幾父亦

卒庶祖母莫氏與兩叔公燾公秀及懋祖二妹獨存初主簿有田八十畝為錢塘浮屠所侵主簿與公麟相繼訴官不能復家用益落莫氏復得公燾公秀與懋祖二妹往訴浙江行省復不省窘不能歸乃棄懋祖及二妹於人懋祖再轉為時貴家奴每思其親輒嗚咽至夜率淚漬其枕如是者十有七年會時貴以罪斥因得放還莫氏洎公燾公秀尚無恙家徒四壁勢不能存懋祖盡變衣裝竭力奉養父骨寄僧舍四十年至是始買地營葬泣血如初喪莫氏俄傷足病卧床稱懋祖扶侍療治得

愈尋人仆於大體煨燼殆半復侍瘞半載始瘞因
念奉蒸嘗者惟田耳田不復祖父之志未伸也乃
奮力與浮屠爭於官總管范公察其實恚斷還之
憊祖得田即以分諸叔後公燾公秀莫氏卒喪葬
各畫禮家門雍睦子亦克肖云

明

盧顯

盧敬

兩浙名賢錄鄞人父祥卿洪武初以世職漕運命督造海運船已而船破運折

生侵漁逮獻將就戮顯敬詣闕請代顯泣訴曰督造雖臣父名而侵漁實臣顯臣罪當死敬曰兄顯佐父周旋運事造船之謀敬獨知之臣罪當死上矜之庶得其寃遂兩釋之

樂杓

名山藏定海亭戶也洪武中會稽錢許二家歲輸鹽厚自縮而迫小民倍輸以掩已數上聞以

浙東亭戶志起赴京鞠訊坐罪輸作杓亦在逮中方治行弟稅請往杓曰吾行雖生死不可知顧吾有三子爾未也稅走詣縣請代杓白縣曰力鹽皆杓也稅烏能知之使往必失對遂行一舍許稅追及杓叱之去不聽即乘危垣以塊提稅垣之塊去者半杓行已遠稅慟哭而還杓至京師果死

陳思禮

徐一夔書宋學士所書陳思禮孝事後思禮四明偶家甫七歲父蚤世母石氏鞠育之母

歿思禮創鉅痛深欲隨母死親戚力慰解之乃止年二十四親友勸之娶思禮掩耳不答衆迫之曰娶妻以為養也親歿何以娶為既而親友據義責之不得已乃從及期合卺危坐誦蓼莪之篇凡七晝夜不輟衣慟路人後以貢至京師入太學為上舍朝士咸稱之

李仕開三子

兩浙名賢錄仕開鄞人操履方正州曲有爭必往質之三子長孝謙次悌謙次

忠謙皆天性孝友依依親側弗忍斯湏去有事兄
必先弟而弟恒代兄親瘵感額聚謀分走東西求
醫藥旦夕迭侍床下親食後食親或旬日不食則
水飲充腹而已終弗御匕箸洪武初郡國例造戰
艦官以仕開富室率編戶成之既成使者驗艦以
苦窳坐法逮讞秋官時孝謙弱冠請代父因曰父
老我壯宜往悌謙甫十八已出為徒伯後請曰兄
素多疾弗能任勞願留養親我當往使者恐其非
情兩械之而偵其所以兄弟終不易辭遂囚其長
者孝謙至秋官論輸作都門涉冰雪負土石手足
疲瘵流血備嘗艱苦閱歲會赦免歸居十年仕開
人以富室主科量米耗法當坐辟忠謙年十九即
荷械詣官曰盜米者囚罪在囚身幸釋吾父官俸
其氣貌許之送御史院有旨免死黥而戌竟沒於
遼東父卒二子號哭幾絕永樂中屢舉孝謙明經
以母老乞終養辭不起比母卒二子哀毀如喪父

已亥詔天下纂修國志太守汪樵起孝謙總裁郡乘書成而卒後七年樵謙亦卒

陳敬

成化四明郡志奉化人年十三家貧業樵洪武

十一年十一月五日隨父入山虎攫其父去敬攘臂大呼疾追及之乃履其尾而以杖擊之虎怒舍其父嚙敬而啖之其父屍賴以全鄉人哀之

李道宗

定海縣志年七歲父世顯以吏員中禍戍甘肅二十餘年道宗長補弟子員日夜西望號

泣告大父及母往尋之徒步抵玉闕時世顯為邊帥記室過於途聞道宗語南音詰所從來知為父子抱持相向泣中丞盧得之欲以戍籍留應甲子秋試道宗長跪曰大父與吾母望父二十餘年今相遇而淹留非初意中丞知不可強徵鎮道釋世顯仍捐俸助之而還道宗初號懷西謂父在西也至此更曰見泉以父號東泉故云

丘緒

名山藏鄞邑諸生父鑑娶余而妾黃黃生緒以不得於余被出鑑卒緒年十五事余至孝余愛

如已出臨卒告緒曰汝自有母不可失也顧緒母出二十年所矣始嚮於邑既而轉徙杳不可跡一夕夢神告曰台州金鰲寺前君母處也明日赴郡懇於逵一人識緒問矣自則故邑氏養馬廐也緒求跡母廐曰周平者曾語其事今成京師矣是時緒姊夫方舉進士需次京師緒貽書物色平會天雨平避雨邸舍姊夫聞其鄉音問之平也為緒問母曰適台州李憲副子以報緒緒立之台至李家李已歿無子所後者漫不知前事緒徇徨道中或告之曰此中有媒老矣導往詢則云黃居李無依適仙居之吳氏緒遂之仙居厯覲數十家見一門頗踽踽而入有兄弟二人皆諸生止緒宿為問其家諸母則黃故主母也然亦不詳所往吁舊蒼頭問之曰適於金鰲寺前去歲經之已殯其簡矣緒

泣曰此吾夢中語也雖然得撫棺泣母亦畢吾志於是吳氏二生送與偕往道犯一牛觸緒墜溝溝在金氏之門金氏兄弟二人為馬長傭肩與緒從溝中起吳氏二生告馬長所繇馬長曰吾昔傭肩與舛一婦人至縉雲蒼嶺下其是乎存亡不可知顧寺荀棺非其人也馬長入門縛輿送緒蒼嶺下徘徊旬餘有織屨者曰去此三舍地名王碧川者有陳氏媼年六十矣君邑人也緒詢諸陳偃偃委巷中忽一媼竚立門次探之鄭人也扣其從來具悉媼亦轉詢邱氏緒乃抱持悲號驚動閭巷陳無子多負緒悲為償理迎母歸率妻子孝事亡怠緒屢舉不第年六十餘貢而卒嘉靖中旌表

夏道昌

兩浙名賢錄道昌居鄭之月湖以漁為業幼孤聽母教惟謹既長而漁日所得魚擇巨者

以奉母母得痺疾日在中大作非沸湯沃之弗止道昌出必巾歸以供湯沐無後時者一日漁於新

莊之河得巨鱗里人厚與之直堅弗與問其故答曰歸以奉母由是名益著及母卒哀毀如不欲生會有詔錫民孝弟力田者衆帛有差道昌力辭弗受

嚴端

甬上耆舊傳字克正號謙齋以進士累遷南車駕員外郎為積忤所中解組歸性至孝母年六

十奉養歷四十餘年母年百四歲朝夕不離左右母齒豁不能餐端手屑良米煮粥搗匕箸以進母有所欲輒力致之少疾即束帶至旦身嘗五藥至母體復始就寢及居喪哀毀彌至其學貫串百氏著有謙齋集

虞謹

沈愷虞孝子傳字靜人寧波人成化間兄謹以富民籍安定亡歸有司逮捕甚亟父憐其哀老

命謹代之行謹曰父命焉敢辭行抵安定毅然就役楊文懿公為之請得免歸宏治間父遺疾謹每

夜稽顙北辰祝曰寧悔予身無災吾親久之賴為
救赤血縷見及卒哭絕復甦三日水漿不入口母
勸之陽為一舉母入復撒去坐卧苦塊袒髮面黑
如因垢母卒一如其父謹體貌壯偉至是哀毀骨
立不復舊容
自號曰瘦齋

陳良言

歙縣志字志行副使槐之子父患目疾歷醫
不效因以舌舐之旬日即愈母得瘋疾七年

不能起身親抱持便溺浣濯志以躬任夜則卧於
床側及卒枕塊三年既葬廬墓三載先是父柩在
堂鄰家失火將及良言望北號呼風
返火滅居室有鵲來巢貓相乳之異

陳浩淵

嘉靖定海縣志一名疎字智寧善騎射工詩
繼父伯瑞卒哀毀逾禮廬墓三年從孫韜宏

治十七年以貢授歷城訓導善事母母疾衣不解
帶既卒廬墓三年致雉鹿芝草之瑞縣令錢如京

為式
其廬

許敬觀

鄞縣志明州衛軍事母至孝一日與同伍十人駕舟販鹽至江北波忽暴風雷電挈舟中

人上泥塗中皆震死敬觀昏絕默念我死毋將誰依忽若有人援之去衆死所三大許而甦雷火燎

髮如禿人以
為孝心所感

謝矩

嘉靖寧波府志字原規鄞人以父命為人後兄員坐事謫戍涼州矩裹糧匍匐走萬里資送終

其身不哀後以例籍父及妻子俱赴戍所矩獨以別籍免矩曰奈何使父與嫂姪獨困苦耶力請與偕抵吳門父病死矩哀毀幾絕以父柩權厝旅舍相嫂姪抵京師適遇例以家屬放還遂復至吳門迎櫬歸葬明年兄沒戍所矩入閭闕數千里函骨歸柩先壟撫其遺孤薦紳高其行扁其堂曰孝義

韓鼎

嘉靖寧波府志字廷陳定海人父仕昭貢入南

號

千里蹤跡故地以求父屍感江神示

夢卒得父骨返葬發解壬子尹句容

許瓏

嘉靖寧波府志字廷璧鄞人少孤依其母無頃

刻舍一日母擲竹誤中瓏暈仆地母急抱持泣

瓏稍癒即睜目笑語曰兒故嚇母非真暈也長竭

力奉養凡母欲必致平居恒言聖門以色養為難

此不假外求不費貲貨直易耳至今

茅山之陽稱純孝焉子元祥成進士

劉晉

籌海圖編昌國人嘉靖三十二年倭入城其祖

老疾不能行晉負祖而逃賊將及祖曰我老甘

死汝宜速去晉

不肯遂俱被殺

馮履祥

嘉靖寧波府志字君德慈谿庠生嘉靖丙辰

倭犯縣履祥隨父出奔賊斷父左手履祥以

身蔽之泣訴曰此吾父也願無加害寧殺我賊竟
刃之其妻袁氏遁於靈山時孕已彌月夜夢神告
曰爾夫為父死當與爾一子次日婦果生一子倭
將入馬策之不前不越境而去人謂孝感所致
嘉靖寧波府志鄞人教授聞理之子幼喪母
奉繼母陳承順篤至嘉靖丙辰倭寇突至宗
時扶父出遇賊拔刀欲殺父宗時以身翼蔽泣求
代遂飲刃而死父得釋時家奴李三抱宗時幼子
不忍舍亦被賊截左耳併刳
其面屢死屢甦人共傷之

王應麒

嘉靖寧波府志慈谿人年十七耽學習文性
至孝倭寇卒至應麒扶母姜氏攜余氏奔匿

鄉圃賊窺見二婦輒拔刀追之二婦亟赴池水余
氏溺死應麒見母遇害以身翼蔽賊亂刃之子母
傷甚

卒

沈良十

有九十年圖編賊犯鳴鶴鎮良十時年七十餘尚

能行息山谷舍中賊追至乃跪拜請死願貸其母
賊見母子俱瞞髮類老舍之而去良十憐母飢渴
方圖飲食賊又至舉刃欲斫其母良
十以身覆母號哭遂被殺母竟得全

鮑倫

嘉靖寧波府志字孟彝鄞人甫七歲父鱗遊學
吳楚莫知所向母孫氏撫倫少長朔望輒焚香

哀禱願父子相見如是者二十年忽有老人自慈
谿來謂倫曰汝父曩與我客湖廣至漢陽東塢授
徒贊婦生二女不幸死矣盍往歸其尸已而至慈
谿適訪老人不得乃從指示詣漢陽跡之皆符婦
家懼有他意訟於縣弗即白繫獄數年縣上府府
上監司監司謂疑獄有刺血驗骸事臨按墓所發
棺令倫咬指滴血直入枯骨其情始決即
棺殮乞歸葬允之監司即慈溪顧英也

鄭十三

定海縣志嘉靖間倭犯東山族人倉卒避難十三請其父偕族行父不急去為倭所及遂

執其父刃之十三抱父尸大哭倭怒并刃之棄尸道上越數日族人歸收其尸十三身首異處右手

猶抱父牢不可解縣尹宋繼祖擬以事聞不果

向叙

籌海圖編字叔禮慈谿人獻令七世孫年十六入府庠賊入縣叙披母而逃遇倭東溪路叙仆

地直前斫其母叙急起抱母頸連呼曰寧殺我乃殺叙舍其母而去巡按上其事詔旌其門

聞繼龍

聞繼泰

鄞縣志繼龍字德鱗五歲喪母哀號如成人事父晨起察色切脈寢

則伺喘息以為常體稍不安輒不離左右夜不解帶手調藥食惟謹奉養三十年執喪哀毀逾節諱日必服經麻昧爽擲沐誦經祭哭盡哀終身如一

日辛年八十一從弟繼泰字治甫父賢臣娶陳氏

生繼泰甫五歲而賢臣歿陳撫繼泰成立娶妻莫合
合登翌日仍與母同室共寢夫妻侍養不離左右
母年八十六而終哀泣如嬰兒身傷柩側凡三載
始出葬後廬墓宗戚以年老力挽之歸乃供母像
榻前晨茶午膳如是者終身卒年七十一子世麟
字瑞宇事大母及父母靡弗如父之事母董司農
守諭為之
傳其畧

馮象臨

寧波府志慈谿諸生家被火偏覓父母烟焰
彌空迷失戶庭象臨大呼初得母即從火中

負出再入負父并挾一弟以出幸體已焦爛聞妹
尚留卧内母號呼將自入亟止之復觸烈焰攜妹
出竟焦灼而
死事聞旌表

錢敬忠

鄞縣志字孝直幼穎悟性篤摯父以事擬重
辟羈江西獄敬忠受經獄中葉日益進聞有

恩赦輒匍匐求援當事不能得萬歷己未成進士
熹宗即位入京誓以必死草疏辨冤乞代父死囚
服伏禁門外疏下法司議獄者憫之父竟得釋謁
選得刑部主事遷守寧國西河詩話甬東錢孝子
父臨江君初為儀部以不附江陵出守臨江會江
陵修憾於吉安故御史劉臺陷之死其羅織成獄
者王開府也江陵死御史江君白臺冤命下行勘
委君及瑞州守究其事適新開府曹君為王開府
導地冀以倖全而君持不誣竟坐王戍曹大怒乃
取他事劾君嚴旨提問擬奪職不可擬杖不可擬
遣戍不可遂擬辟復御筆判狀曰即決於是舉朝
大震九卿及臺省以下皆互疏切爭政府中公時
行亦具密揭然後得更秋後其後中公陰檄江省
令是年勿決囚而漸以舊青暎溫使連停秋決者
若干年孝子初生之時即君入獄之歲歷歲若干
始受書獄中又歲若干始就試又歲若干始登鄉

薦登第然猶未敢訟寃至神廟升遐而後號呼詣闕下猶不敢訟言不宜死即宜死願以身代如是者有年而後出獄暨出獄數年而後死然則孝子之用心如是其疾且久也當君死時距出獄不滿三歲孝子哀痛幾殉之倪文正元璐有慰孝子書一篇傳人間孝子先世自侍郎副使君下暨孝子俱以進士起家後臨江君孫肅樂亦以進士為刑部郎殉國難

謝瀚

吳偉業謝瀚傳字愛夫號泮池其先有令定海者遂家焉瀚年十二一日見家不能炊因謂其

仲曰需青紫何時萬一吾父母朽羸至不及待奈何爾執不律吾行且逐烏免走矣遂棄制舉義修業吳越間壹意奉父母歡仲廼得卒學成進士瀚父性好晏處會歲除辟失火蕩其室僦舍以居輒忽忽不樂瀚廼慮材鳩傭落成父始喜然以無樓居且未陽也瀚復自為甬築楯柶之屬以意審

面於拮据中竭蹶成之父乃樂甚為加餐仲為奉
政宦遊萬里外滿家居養母備極情志奉政無內
顧憂與瀚沒齒友愛視養
者青紫數言始終無間云

王伯化

天啓慈谿縣志字子魚父沒哀毀如禮嘉靖
丙辰倭入縣治士民倉皇出走伯化掖母出

郭外同行者曰賊迫矣曷求活計伯化曰母活我
活安用求為頃之僕又告曰賊迫甚子母恐不相
顧矣僕亦去伯化掖母以前母曰母子同死無益
汝急去詰朝可收吾骸伯化號泣掖之如初望賊
呼曰余鎖汝金毋傷吾母賊揚刃向母伯化以身
承之遂遇害賊見伯化死竟掠金不兵其母而去
至隆慶壬申母始以壽終伯化之子大韶拔淚
走四方以旌父孝母已空山廬墓猛虎為馴

姜國望

天啓慈谿縣志字道卿邑博士弟子負嘉靖
丙辰四月倭突入居民逃竄時母陸初喪在

殞國望抱棺痛哭誓不相離賊至樞前似以為不祥不敢逼近已乃潛蹤暗室從隙中窺見將舉火忽聞外間哨聲輒投火去如是者三抵暮聞里人音急出糾衆排牆遷柩昇至空地不及於難

董得偶

鄆縣志字天鑑父應圭知易州直流寇侵逼得偶從一蒼頭奔候歷荒原叢骨中又遭雨

電傾仆頭目皆損惟冀得覲父雖艱險不顧也及遷知鄧州復為寇所圍得偶聞之又兼程而往時父以憂勞成疾相持而泣未幾父卒扶櫬歸崇禎丙子赴省試聞母病早涸無舟徒步至返已而母愈復徒步往至則適當試期是科領鄉薦家貧與昆弟羣從極友愛子允璫已酉登賢書

李士模

鄆縣志字叔範父坤元卒營壙於西墓深山遂廬墓焉嘗丙夜有虎窺之色不為動夢父

遣之歸涕泣復居一年子如玉明經高第授龍泉博士

國朝

陸崑

舊浙江通志字華星鄞人有至性在親側未嘗疾言遽色家貧祖父年八十餘惟崑侍食能當

其意喪母晝夜哭哀動鄰里藉館穀以養父遇其母諱日雖甚風雨必從館中手攜母所嗜為祀品已亥夏五月海寇入郡東崑父匿其親殷家冠入門先執其父欲刃之崑直前哀詞丐生願以身代遂遇害父得釋

謝泰交

鄉賢留祀冊字時際號天童山人家定海幼敏博學補諸生貢入京師丁酉舉順天鄉試

踰歲卒年四十八幼痛母周早辛誓以其身服勞於父嘗為吮癰而愈與諸兄考方書極病癢經營別墅以娛奉之事其兄祇敬篤愛家無餘財執親喪孺慕泣血其葬也廣輪掩坎挈畚把土手足皸

瘵攀號松柏不忍舍
去著思親雜咏百篇

朱金詰

題旌冊鄆縣人父病封股和藥以進疾遂已
時山賊掠鄉邑金詰負親避難父為賊所執

金詰跪求哀懇曰寧殺我勿傷我父賊憐之父子
俱得釋又嘗刺血書經以延母壽母卒入山號泣
虎為斂跡順治九年奉旌

范洪震

鄆縣志字驚百鄆縣人母卒廬於墓側寢苦
枕塊疏食飲水旦夕哭奠如初喪三年然後

歸後父疾憂痛徬徨至為嘗
夫順治十五年具題奉旌

陶顯曾

題旌冊鄆縣人事父孝數十年無倦容父病
焚香籲天願以身代一夕夢神告曰爾孝格

天當增爾親壽疾遂愈康
熙四十五年具題奉旌

李景瀛

題旌冊鄞縣人父母早歿繼母撫養之得成立母病癰景瀛扶持左右躬親藥食歷七載

無倦色康熙四十

五年具題奉旌

李秉誠

題旌冊鄞縣人年八歲嫡母亡擗踊哀號見者流涕後繼母卒廬墓三年父病癰染床第

者六載秉誠醫侍弗倦康熙四十

五年具題奉旌

董道權

題旌冊鄞縣人父病時值大雪求醫弗至道權雪夜負醫而行嚴冬冒寒弗顧也奉繼母

尤孝兩親歿後廬墓三

年雍正六年具題奉旌

浙江通志卷一百八十四

欽定四庫全書

浙江通志卷一百八十五

人物七

孝友三

紹興府

漢

楊威

水經注賤上虞人少失父事母至孝嘗與母入山采薪為虎所逼自計不能禦於是抱母且號

且行虎見其情遂弭耳而去

顧朝

兩京雜記會稽人少失父事母孝母好食彫胡飯常帥子女躬自採擷還家導水鑿川自種供

養每有贏儲家近太湖湖中後自生彫胡無復餘草蟲不敢至遂得以為養郡縣表其閭舍

陳業

太平御覽會稽先賢錄業字文理兄渡海傾命時同依止者五六十人骨肉消爛不可辨別業

仰皇天誓后上曰聞親戚者必有異焉因割臂流血以灑骨上應時飲血飲皆流去

三國吳

丁覽

嘉泰會稽志字孝連山陰人八歲而孤家又單微清身立行用意不苟推財從弟以義讓稱仕

郡至功曹守始平門無雜賓孫權深貴待之未推用卒子固字子賤少喪父獨與母居色養致敬族弟孤弱與同寒溫孫休時為左御史大夫孫皓即位遷司徒皓悖虐固與陸凱孟宗同心憂國年七

十六
卒

祁庾

樊正

三國志注會稽典錄山陰祁
庾上虞樊正咸以代父死罪

朱朗

三國志注會稽典錄朗字恭明會稽永興人父
為烏傷長陳頤所殺恭明志在報讎未聞頤滅

亡刺殺其
子遂奔魏

皮延

廣博物志會稽典錄延字叔然會稽山
陰人養母至孝居喪有白鳩巢於廬側

晉

夏方

晉書本傳字文正會稽永興人家遭疫癘父母
伯叔羣從死者十三人方年十四夜則號哭晝

則負土十有七載葬送得畢因廬於墓側種植松
栢鳥獸馴擾其旁吳時拜仁義都尉累遷五官中

郎將吳平除高山令百姓有罪應加捶撻者向之
涕泣而不加罪大小莫敢犯焉在官三年州舉秀
才還家卒
年八十七

南北朝

賈恩

宋書本傳會稽諸暨人少有志行為鄉曲所推
重元嘉三年母亡居喪過禮未葬為鄰火所逼

恩及妻柏氏號哭奪救隣近赴助棺櫬得免恩及
柏居燒死有司奏改其里為孝義里嗣租布三世

追贈天水郡
顯親都尉

郭世道

宋書本傳會稽永興人生而失母事父及後
母孝道淳備年十四喪父居喪過禮殆不勝

喪家貧無產業傭力以養繼母婦生一男夫婦共
議曰勤身供養力猶不足若養此兒則所費者大

乃垂泣瘞之母亡負土成墳親戚或共賄助微有所受葬畢傭賃倍還先值服除後哀戚思慕終身如喪者元嘉四年遣大使巡行天下散騎常侍袁愉表其淳行救郡榜表門閭蠲其稅調改所居獨楓里為孝行焉太守孟顓察孝廉不就

郭原平

宋書郭世道傳世道子原平字長恭幼稟至行父抱篤疾彌年原平衣不解帶口不嘗鹽

菜者跨積寒暑未嘗睡卧父亡哭踊慟絕數日方蘇營壙凶功不欲假人乃訪邑中有營墓者助人運力經時展勤久乃閑練又自責十夫以供衆費宅甽之事儉而當禮每至歲節蒸嘗哀思絕飲粥父服除後不復食魚肉自此迄終三十餘載高陽許瑤之以綿一觔遺原平不受送而復返者前後數十瑤之乃自往曰今歲過寒而建安綿好以此奉尊上下耳原平乃拜而受之及母終毀瘠彌甚

僅乃免喪墓前有數十畝田不屬原平每至農月耕者恒裸袒原平不欲使人慢其墳墓乃販質家資貴買此田三農之月輒束帶垂泣躬自耕墾太守門僧朗察孝廉不就太守蔡興宗臨郡深加貴異以私米饋原平辭不受泰豫元年興宗徵還京師表其殊行舉為太學博士會興宗薨事不行明年元徽元年卒於家三子一弟並有門行長子伯林舉孝廉次子靈馥儒林祭酒皆不就

何子平

宋書本傳世居會稽事母至孝揚州辟從事史月俸得白米輒貸市粟麥人或問曰所利

無幾何足為煩子平曰尊老在求不辦常得生米何心獨饗白粳每有贈鮮肴者若不可寄致其家則不肯受元嘉三十年除吳郡海虞令縣祿惟以養母而妻子不犯一毫人或疑其儉薄子平曰希祿本在養親不在為己問者慚退母喪去官哀毀踰禮值大明末東土饑荒八年不行營葬晝夜號

絕常如袒括之日所居屋敗兄子伯興欲為葺治
子平不肯曰我情事未申天地間一罪人耳屋何
宜覆蔡興宗為會稽太守甚
加旌異泰始六年為營家柳

公孫僧遠

南齊書本傳會稽剡人治父喪至孝事母
及伯父甚謹年饑省飧減食以養母及伯

弟亡無以葬身貶貼與隣里供飲送之費躬負土
手種松柏兄妹未婚嫁乃自賣為之成禮名聞郡
縣建元三年詔
表門閭蠲租稅

剡縣小兒

南齊書杜栖傳建武二年剡縣有小兒年
八歲與母俱得赤斑病母死家人以小兒
猶惡不令其知小兒疑之問云母嘗數問我病昨
來覺聲羸今不復聞何也因自投下床匍匐至母
屍側頓絕而死鄉隣告之縣
令宗善才求表廬事竟不行

韓靈敏

南齊書本傳會稽剡人早孤與兄靈珍並有孝性母亡家貧無以營凶兄弟共種瓜半畝

朝採暮生以此遂辦葬事靈珍亡無子妻卓氏守節不嫁靈敏事之如母

鄭僧保

弘治紹興府志剡人居父母喪廬墓十載芝草生於墓甘露降於松柏

虞荔

南史本傳字山波會稽餘姚人祖權梁廷尉卿永嘉太守父檢平北始興王諮議叅軍荔幼聰

敏有志操善屬文梁武帝用為士林學士遷通直散騎侍郎兼中書舍人侯景之亂荔率親屬入臺

除鎮西諮議參軍如故臺城陷元帝徵為中書侍郎不就逃歸鄉里武帝招之乃應命至都文帝嗣

位除太子中庶子初荔母隨荔入臺卒於臺內尋而城陷情禮不申由是終身蔬食布衣不聽音樂

弟寄寓於閩中依陳寶應荔每言之輒流涕文帝乃勅寶應求寄不遣因以感疾帝再三臨問手勅

中使相望於道又以疏食積久非羸疾所堪乃勅
曰卿年事已多氣力稍減今給卿魚肉不得同從
所執蒞終不從卒
贈侍中諡曰懿子

虞寄

陳書虞蒞傳蒞弟寄字次安少聰敏年數歲客
有造其父者遇寄於門嘲曰郎君姓虞必當無

智寄應聲曰文字不辨豈得非愚客大慙入謂其
父曰此子非常人文舉之對不過是也及長善屬
丈岳陽王為會稽太守寄為中記室掾侯景之亂
寄隨兄蒞入臺城陷遁還鄉里張彪往臨川彊寄
俱行時陳寶應據閩中得寄甚善每欲引為僚屬
委以文翰寄固辭獲免及寶應潛有逆謀寄每陳
逆順之理諷諫寶應輒引他事拒之寄慮禍及已
乃居東山寺偽稱脚疾不起寄還朝文帝謂曰管
寧無恙其慰勞若此後除車中郎建安王諮議加
戎昭將軍辭以疾不任與兄蒞隔絕因感氣疾每

得荔書輒奔劇危殆者數矣前後所居官未嘗至秩滿纔期年數月便自求解退所製文筆遭亂多存不

唐

李渭

唐書孝友傳渭蕭山人冊府元龜文宗太和七年三月浙江東道奏渭幼失父母與兄二人同居兄病渭割股療之因差後兩兄俱死奉寡嫂孤姪二十餘年衣食無偏莊田租稅渭自主辦資財

管鑰寡嫂掌之其家頻生芝草詔旌表門閭

丁興

火鑄會稽三賦注會稽人家近荒野野火延燒興母老病乃濕衣覆母以身障火身死母全

張萬和

唐書孝友傳萬和諸暨人嘉泰會稽志遭父母喪兄弟廬於墓側二十餘年有芝草生甘

泉出兩浙名賢錄萬和子孝祥亦廬墓二
十餘年事聞詔旌其門名其里曰孝感

許伯會

唐書本傳越州蕭山人元度十二世孫舉孝廉上元中為衡陽博士母喪負土成墳不御

絮帛嘗滋味野火將建塋樹悲號於天
俄而雨火滅歲早泉湧廬前生靈芝

戴恭

唐書孝友傳恭蕭山人嘉泰會稽志字元敬少居母喪十年廬墓生芝草嘉禾

俞僅

唐書孝友傳僅蕭山人嘉泰會稽志遭親喪哀毀骨立為鄉里所稱觀察使孟簡嘗書於圖經

以勵風俗

宋

裴仲容

雲門志畧會稽人慶厯中事母至孝母病刲股以進其弟仲莊亦將刲之聞兄已進乃止

母病遂瘳是時雲霧蔽覆其
家里人駭觀以為孝心所感

楊文修

於越新編諸暨人母病刲股以進遂愈歿負
土成墳慈烏數十隨之往反鄉閭欲上其事

固止之文修故病瘳道遇異人以手
摩之瘳移於背鄉人皆呼曰佛子

孫寶著

弘治紹興府志字天休蕭山人少孤事母孝
母疾思梅及鳩秋月不可得仰天號訴忽得

青梅於樹鳩自飛墜
取以奉母母疾遂愈

蔡定

宋史本傳字元應越州會稽人父革依郡獄吏
傭書以生資定使學遊鄉校稍稍有稱郡獄吏

一日坐舞文法被繫革以誑誤年七十餘法當免
繫鞫胥任澤削其籍年而入之罪且與獄吏等定
痛父以非辜墮圖狂誓將身贖數詣府號懇請代
弗許請效命於戍行弗許請隸五符為兵又弗許

定知父終不可贖仰而呼曰天乎將使定坐視父
纏穢縶乎父老耄不應連繫備書罪不應與獄吏
等理明矣而無所懇父老而刑定之生其何益乎
於是預為誌銘其墓又為狀若詣府者結置袂間
皆叙陳致死之由冀其父之必免也以建炎元年
十二月甲申自赴河死府帥聞之驚曰真孝立命
出革厚為定具棺
斂事而撫周其家

鄭鼎之

兩浙名賢錄字從革會稽人建炎初寇起士
女悉奔竄鼎之獨衣冠事父湯藥不去賊至

斥曰衆皆逃死而敢獨留不畏死耶鼎之曰豈不
畏死顧老父年七十餘病且革不能負以俱逃若
棄父逃生心尤不忍死雖痛奈獨父何言與淚俱
賊為感泣舍去且戒其黨勿更入孝子門以是父
子俱免
於難

王公衮

齊東野語會稽王宣子尚書母葬山陰獅子塢為盜所發時宣子為吏部員外郎其弟公

衮待次烏江尉居鄉物色得之乃本村無賴嵇泗德者所為遂聞於官具服其罪止從徒斷黥隸他州公衮不勝悲憤時猶拘留鈴轄司公衮遂誘守卒飲之以酒皆大醉因手斷賊首提之自歸有司宣子亟以狀白堂納官以贖弟罪事下時楊椿為給事謂公衮復讐之義可嘉殺掘塚法應死之人為無罪納官贖弟罪之請當不許詔從之

呂蒙

成化新昌縣志事親至孝父卒葬邑之杜潭蒙不忍舍去居墓下久不返子琰憂懼不已即其

母所葬龍巖謀築室其傍將迎居以便終養紹興戊辰畢力成之乃迎父於其中蔬食四十年一日焚香危坐而逝遂合葬於龍巖琰克終大事悉以家務屬諸子曰居舊廬戀慕不返榜其廬曰報慈

每至諱日必哭泣盡哀以奉祭祀積年不懈後以子貴封迪功郎卒亦葬於龍巖陳止齊為之銘

趙孟傳

紹興府志字商卿家於上虞年十六隨父武顯之官池陽道遇寇執武顯索金帛孟傳以

身翼父謂賊曰寧殺我勿傷吾父賊斫武顯數刀衣裂而骸不傷相顧曰此孝子也釋之去

元

石明三

元史本傳石明三者與母居餘姚山中一日自外歸覓母不見見壁穿而卧內有三虎子

知母為虎所害乃盡殺虎子礪巨斧立壁側伺母虎至斫其腦裂而死復往倚巖石傍執斧伺候斫

殺壯虎明三亦立死仆張目如生所執斧牢不可拔

錢興祖

任士林錢孝子墓誌字國材家上虞事親孝母疾二年不愈醫藥且匱膚體不惜及終貧

不能葬孺子泣者五年既葬白鳥千百集墓木上
二太鶴巡行墓傍百日而後去人以為至孝所感

卒至元己卯
年六十七

石永

元史本傳紹興新昌人性淳厚事親至孝值亂
兵掠鄉里永父謙孫年八十老不能行永負父

匿山谷中亂兵執其父欲殺之永亟前
抱父請以身代兵遂殺永而釋其父

謹按名山藏於越新編等書
俱作石永壽今從元史改正

陸思孝

元史本傳紹興山陰樵者性至孝母老病痢
思孝醫禱久之不效方欲剗股肉為糜以進

忽夢寐間恍若有神人者授以藥
劑得而異之即以奉母疾遂愈

丁祥一

輟耕錄越楓橋里人母雙目失明丁至孝每
朝盥漱訖即舐母之目積有年俄而母左目

明末久右目復明憲司上其事於朝
表其間曰孝子之門至治年間也

謹按輟耕錄止稱丁孝子
今從弘治紹興府志標名

張觀僧

成化新昌縣志字子用元季隱居不仕父雙
瞽奉養不怠至正中寇亂居人皆驚走其姪

德邦進曰祖父失明而吾父多病今時事若此奈
何觀僧曰救父為急脫有不幸即以身代可也乃
相與各負其父避鷓鴣山中俄而賊至揮白刃索
金欲殺之二人叩頭流血願自身死弗害父命賊
感而釋之父子遂得俱全

周元助

諸暨縣志字良佐元至正間從弟元祐被誣
將逮良佐毅然往代力辨得直鄉人義之

陳福

鐵崖樂府序越之錢清人年十歲侍母葉病衣
不解帶母病甚水漿粒食不進口中夜潛出後

庭泣於天曰我母病將死吾何依封股代藥天其
從我乎股封而母已死予居與童隣親見其事可
以弘獎風教
遂為賦詩

黃義貞

於越新編字孟廉餘姚人篤學好修事親以
孝聞大德間徵拜博士辭不就隱居鳳亭壽

一百五歲其六世孫濟之能修義貞之孝失慈於
繼母構於父而出之益承順無違及父母歿廬於
墓弘治中
詔表其門

徐允讓

續文獻通考山陰人元末兵亂允讓奉父安
避山谷間遇寇斫安傷頭允讓大呼曰寧殺

我勿殺我父賊
捨安殺允讓

明

胡剛

成化新昌縣志字性輔洪武初其父坐累工役泗上以躲工事覺當刑勅駙馬梅伯殷監斬共

八十二人時剛方裹糧往省以代役於待渡間聞其事遂蹀跣汨河而渡奔赴刑所求以身代言與

淚俱情甚哀切梅憐而奏之特宥父子俱全而同事者俱獲免

丁美

諸暨縣志字文彥兄進洪武初被誣逮者至美度兄恆且訥必不免請代行兄曰事在我汝何

預焉美紹逮者曰此吾兄也欲代吾行乎連者以為實固驅美行竟死逮所鄉人義之

王彥達

明孝友傳餘姚人父綱洪武初擢廣東參議往督兵餉還至增城為海寇曹真所得為墮

羅拜脅為謀主綱唾罵不絕口遂遇害彥達哀號請代不得且哭且罵曰賊并殺我其酋長曰父忠

而子孝殺之不祥與之食不顧賊憫其誠孝釋之乃綴羊革裹網屍以歸彥達痛父以忠死力耕養

母終其身不仕

楊宗暉

諸暨縣志洪武初父叔器為椽獻魚鱗圖違式當誅宗暉赴法曹訴曰此宗暉實為之今

誅父是宗暉陷之也願以身代父死法曹為上其訴許之時年十九

劉謙

劉宗周家傳字惟恭父芳齋洪武中坐市民充吏法永戌邊得雲貴之烏撒衛時謙甫踰冠往

來供衣履命其仲子壇往死於塗後芳齋歸老山陰謙代役死戌所或傳謙以督運死京師

劉謹

於越新編山陰人洪武中父戌雲南謹甫六歲知痛其父問曰雲南在何方或以西南指之輒

朝夕向西南拜稍長乃矍然曰雲南雖萬里天下豈有無父之子哉即束裝尋父歷六月抵雲南遇父於逆旅相持號慟俄而父患瘋欲以身代國法戍邊者惟十六以上嫡長男始得更替於是復歸

携其伯兄子往而伯兄子亦尚孱弱於是又歸悲
寓其家資以往蓋三返雲南始得歸其父父歸而
家徒四壁幾不能為生謹力供菽水晨昏必極其
歡督學使者張倬為傳其事劉氏家譜謹字惟勤
嘗名其所居之堂曰遂安言
遂親安也及父歿因以自號

呂升

成化新昌縣志字德升父年百歲人歲為百歲
老人升幼失母哭泣過哀遂不寢私室與老人

同起處若嬰兒不離母狀後父病囊腫其大如瓠
便溺不能自適升以罌附肉就注之必淋漓滿手
搦布帛徐挹之畧無倦色又嘗與父對生榻上以
被擁父兩股膝持足納置胯間以煥洪武初縣令
以孝弟舉將授以官自陳親老懇辭終養既終喪
居家教授所居一室扁曰小齋人呼呂小齋而不
敢字卒年
七十一

竺瓚

世兄紹興府志嵊縣人性孝友其家同居已四

我非兄也官乃繫瓚而釋瓚獄未具而瓚卒

應溫遠

嵊縣志崇仁鄉人讀書尚義有府倖署邑篆索其父芭苴不與受庭辱含憤卒溫遠治喪

後寢食俱廢輒曰不共戴天誓必報之乃治牒走訴通政司得引白下法司鞫問倖伏罪

婁可道

萬厯紹興府志會稽人父坐巫咒罪當死可道赴有司請代繫竟絞於五雲門外

吳希汴

萬厯紹興府志字克素新昌人事父宗信孝謹洪武初民斷指者法戍邊宗信以疾失將

指之半里長將捕之希汴憂形於色會善接指者希汴乃截已指以接父指月餘瘡愈而復潰希汴

顧天誠禱復截左指接如前法血交氣貫閱月乃愈宛然一指如生鄉里驚歎為孝感所致

趙紳

明孝友傳字以行諸暨人父秩永樂中為高郵州學正考滿赴京至武城墮水紳奮身下救河

流湍悍俱不能出明日屍浮水上紳兩手抱父臂不釋宣德五年旌其門

俞正儀

於越新編上虞人永樂中母病革百藥不治或云取肝作羹可療正儀信之設齋壇焚香

稽首祝刀割右脅破二寸許取肝剖之廣半寸長三倍調羹而進母飲甘之觀者環堵或謂之痴人

遂呼為俞三痴母病稍退適旬終正儀竟無恙

宋泰

名山歲會稽諸生家貧事母孝與妻吳攜褐不完而母之服饌殊極艱軟母性卞急逢怒與妻

同跪欲撻則近榻以就之泰死無子吳奉姑至死備諸辛苦

張震

明孝友傳餘姚農家子生周歲父為人所陷將死齧震指語曰某吾讐也汝勿忘震長而指瘡

不愈母告以故震誓必報其友謂曰汝力弱吾為汝殺之未幾讐乘馬出友以田器擊之即死震喜走告父墓已而事發有司傷其志減死論戍遇赦歸

孫文

明孝友傳餘姚人幼時父為族人時行篳死長欲報之而力不敵乃偽與和好共武斷鄉曲時

行坦然不復疑一日值時行於田間即以田器擊殺之生戍遇赦獲釋

周廷瑞

韓邦問周廷瑞墓表字孔麟山陰前梅里人生有至性父老病瘳正統間閩越鄧茂七倡亂

至嘗矢以驗之疾亦瘳正統間閩越鄧茂七倡亂朝廷檄浙民兵征之父當行廷瑞請代成化甲午

領浙江鄉薦俄丁外艱服闋再試禮部中乙榜遭母喪廬墓下晝夜悲號哀毀踰禮竟以疾卒

鄭嘉

列朝詩集傳字原亨山陰人篤行好古母病嘗糞甘苦未復不就枕鄉人稱柿莊先生

徐守誠

萬歷紹興府志字成之餘姚人弘治進士授南兵部主事尋執父喪廬於墓有馴虎甘露

之異鄉人名其山曰慈山服除補刑部與四方名士相討論學益進嘗陳時政十餘事多見采納出為湖廣僉事理冤釋枉不避權勢遷山東參議以疾歸守誠孝友廉介非其義一介不取歷官二十餘年室廬僅蔽風雨有慈山雜著數十則為學者所誦

張璣

列朝詩集傳字蘊之嵎人從羅頎學經史一覽不忘詩文操筆立就天性孝友父跛不能行背負終身弟病痴養之至老人以為篤行

高珣

嘉靖山陰縣志本農家子早孤行傭以供母母卒葬刑塘下以母生時畏靜每夕往墓所措苦薄以卧四無牆壁地沮洳多虺蛇珣不為患歷三載不輟當沍寒時有物夜來煖珣足習以為常珣

初意其為猫或以告人人密窺之始知為狐也郡倅劉玉白其事於當路士大夫多為詩歌以傳之

杜櫟

萬厯上虞縣志年七歲父遠遊不歸朝夕思慕及總髮婚甫彌月求母模父像徒步訪尋至雲

南金齒驛遇其父奉事未幾父卒櫟痛旅櫬難還晝夜悲號親昌梁某攜之以歸舟過鄱陽湖風濤大作幾覆櫟跪禱號泣頃之波浪靜息乃克歸葬事母徐雖處窮約務得其歡心母沒時櫟年已七十猶廬墓三年人稱為杜孝子

何競

毛奇齡何競傳蕭山人父舜賓監察御史與權有力忤謫戍廣西慶遠衛遇赦還里時當塗鄒

魯以御史謫宰蕭山舜賓語侵魯魯恨誣以身絀戍逃無遇赦牒冒濫冠帶應押解原衛庶理揭下所司治所司不可魯念舜賓終害已會舜賓門下士童顯章知魯陰事魯陷以他罪論絞獄上憲司

凝之更下府覆驗道舜賓家魯噉解人押顯章過
舜賓隨遣皂捕等五百餘人執器圍其家曰舜賓
篡取重囚毀門而入剽原給蔽牒持舜賓顯章去
下顯章獄立為文解舜賓原衛庶理不俟詳覈督
蒯捕任觀等十一人執器押就道續遣田敏胡紀
等十三人諭意追之三衢屏去服食至餘干宿昌
國寺毆之不死反禿袖蒙面氣絕弘治十一年七
月日也舜賓就道時魯捕其家人者四出競方患
癰力疾負母朱提其妻虞投父同年友王鼎家既
而魯遷山西按察司僉事已卸印詣省取憑競先
一日歸匿族父何寧家召故人親暱飲之酒伏道
傍魯出導盡將過與競手鐵尺直前率衆二十人
揪魯仆與杖一齊下矐其目剔其鬚髮更相溺之
競拔佩刀斫其左股衆止之競與魯並項鎖預令
族父何澤二負黃袱赴闕訟寃度出闕鳴鼓控按
察司發分巡僉事蕭珙簡閱珙故黨魯乃刑競令

其誣服競大呼曰必欲殺競競宜畏死者顧爾無
父母耶且事已上聞此身非爾所得殺噬臂肉擲
案上魯引手摩案若將厭肉則念魯已盲廢而競
氣直不可誣乃視魯曰是肉亦非爾所能食矣遽
起不得決而何澤二已訟闕下遣郎中李時給事
中李舉會巡按治之審者各持兩端胡紀等亦私
念罪重隱其實乃擬魯故屏人服食至死競部民
毆本屬長官篤疾俱絞競不伏其母朱赴鼓院搥
鼓復命大理寺寺正曹廉會巡按覆治廉曰爾奈
何毆縣官競曰競知父讐不知縣官也但恨毆之
勿殺之耳廉為動容乃遣本縣揭積驗啟積競號
呼齧指血漉骨驗其真觀者皆哭然後藉件易衣
斂報傷訊解人任觀遂吐實且出舜賓絕命血衣
於是衆皆伏左驗無異乃改魯造意謀殺人斬競
毆傷五品以上官加凡人二等徒三年田敏胡紀
絞獄上令法司議刑部議魯罪當競宜倣唐孝子

梁悅例充軍於是辟魯戍競福建福寧衛正德改元赦歸又九年卒競自復讐至死凡一十六年服其身終

俞孜

名山歲山陰諸生父華以解流徒徐鐸赴口外防鐸過嚴鐸毒而斃之孜聞號痛扶輓誓以死

報徒跣根跡匪數十郡間已歸越匿其甥楊氏家乃結力士數人佯為賣魚往來偵伺迄亡所獲卜之城隍得渙之三益悲痛欲死夜夢神語之曰若謂渙不祥獨未知一喚即在也孜驚悟詰旦詣郡守乞助守壯而助之夜半驟入楊氏家喚鐸立得之卒復父讐遂不復應舉養繼母以老人稱為復

讐俞

孝子

周傑

嵎縣志字廷智東隅里人父愚受誣論死傑甫三歲能隨母悲啼愚繫獄二十年傑遂走闕下

上疏請以身代居京師數年疏累上情詞慨切上悲其意詔釋恩罪寧家孝養二十餘年後居父母

喪哀毀盡禮邑令許

岳英以孝義表之

陸尚質

名山藏山陰人送父登舟海口風作舟將覆號泣投風濤中救父父舟得濟尚質溺死人

名其渡曰陸郎渡嘉靖中旌表

吳濬

徐渭吳孝子墓誌字潮源號素齋世居山陰利樂村成化十八年年十歲輒抱書以數言活父

於御史臺人奇之及長修身表俗務厚人道嘗淪肱劑父病父死侍母寢足不至閨闥冬煖衾四十

年如一日廬火以構忘母辰一弗壽遂終身不令家壽年八十道父母生時事尚作嬰兒啼其於人

好解劇紛里中事行止必曰吳孝子任否人藉以為重云

姚鏜

上虞縣志成化丙午舉人授政和縣教諭偕父客行遇劫盜殺父鏜直前赴救抱持哀號盜併

刺其腹腸出膜外血滿脰猶不釋孫翔鳳登進士

來衡

蕭山縣志字一之成化間父為義子誣論死衡伏闕奏辨獲釋後從東粵還舟溺於江聞空中

呼救孝子忽一杖浮至得憑以濟其杖至今尚存

徐恩

嘉靖山陰縣志項里人家貧不甚知書而孝友出天性與兄文刈薪項里嶺日未午一虎從叢

篠中出噬文牙貫肩項恩急顧得一木拮擊虎釋屍去已而虎復來恩與虎鬪虎創甚恩負屍而還

力盡亦死

黃濟之

紹興府志字世美餘姚人二歲母喪失惟於繼母秋穫時輒使之露守山田多虎不避而

往父從軍陝西力請代役途遇盜自陳情款盜不加害父母歿盧有白鵠之祥弘治中奉詔旌

馬彥清

會稽縣志字天澤母張氏手績撫孤彥清偕兄彥通弟彥邦朝夕敬養既而兄以謫籍補

戍遼左弟充萬石長因督徵逼迫被仇家捱懇緹騎赴浙建弟彥清憫弟未有子恐傷母心詭託弟

名投布政司械送金陵訊逋秋糧寘重辟郡守湯紹恩旌之

鄒大績

餘姚縣志字有成從學王陽明父鵠疾侍疾盡瘁及卒廬於墓側風雨不蔽虎為遁去紫

芝生墓右一本三秀每號泣烏鵲羣鳴若助其哀者鄉里以為孝感奉旨旌表子木母病割股人稱

孝世

黃驥

餘姚縣志字德良父肅按察司副使驥七歲喪母盡像事之感時流慟奉繼母以孝聞父病嘗

糞及沒毀瘠過禮造立塚墓躬自負土墓成雙鵲巢其梁又有野犬為巡警一夕虎銜豕置於庭而去嘉靖十七年表為孝子

黃亨

山陰縣志隨兄里宦雲南里既被害寇方肆掠亨痛兄死即率衆百餘與寇戰勇氣百倍寇不支潰去亨亦傷其左目瀕死抱兄骨歸葬於鄉論者謂里死官而享破寇報國且報兄忠義萃於一門

沈曰禎

嘉靖山陰縣志字天祺少遊鄉校以父客河南音問久絕白於學官欲往尋覓時功令凡

諸生稱故遠遊者例戍邊學官難其行曰禎曰使得見父雖戍不辭奮然以行備歷辛苦卒遇其父於逆旅奉以歸尋領鄉薦

夏千

會稽縣志東閩人饒膂力負奇節事父以孝聞東閩居水濱生不識虎村民朝牧牛虎忽起叢

草中衆驚呼虎逸入千園中父出見攬時千方飯吐哺急走手持竹筯連築虎頭虎爪其面不為動築愈急虎舍之去千負父歸賜出納而紉之禱於庭曰父生願偕生否願偕死父創甚碎不得善藥因攬庭中苦草嚼而傅之痛少止俄羣獵過其門趨詢治虎傷之藥獵者入視之曰啼此即是也和酒飲之即愈事聞議旌胥索賄千不與曰奈何行錢買孝子也事遂寢

黃璽

明孝友傳字廷璽餘姚人兄伯震商十年不歸璽出求之經行萬里不得後至衡州禱南嶽廟

夢神授以纏綿盜賊際狼俱江漢行二語一書生告之曰此杜甫春陵行詩也春陵今道州蓋往尋之璽從其言既至無所遇一日入厠置傘道旁伯震適過之見傘柄有餘姚黃廷璽記六字方疑駭

璽出問訊則其兄也遂奉以歸

張居禮

新昌縣志字節之邑庠生父病棄學歸養及父卒哀毀踰禮既葬欲廬墓母史曰我久病

不欲汝去左右乃止侍母二十七年母嗜魚拆室為池身自芟草畜魚以供甘旨人名曰孝魚池母

年九十八而卒合葬柘溪廬於墓側

石槐

新昌縣志敬彥孫父病侍湯藥躬廁踰七年不懈父歿哀毀骨立柩殯在庭隣火延熾仰天號

慟風返火滅及葬廬墓三載

姚希唐

獻徵錄字德欽號春野嵎人從錢緒山王龍溪兩先生遊父病亟醫待弗效親為嘗洩歿

則致哀而慎於禮服闋以例補禮部儒士歸則奉其母甚歡丙寅秋謁選得崇明縣簿迎養其母卒

未循例入覲聞母疾遂陳乞終養不待報而歸當
事重其才擢三台竟三辭不起設一榻於母側朝
夕伺起居察寒燠唯諾勿暫離母疾躬調湯藥中
庭露禱願減巳年益母壽母卒無恙後母得目疾
至失明希唐仰天號泣者月餘淚盡枯而母眼復
明奉養二十餘年母以壽終而希唐年亦七十矣
擗踊哀慕猶孺子容楷在殯苦塊其旁一夕東隣
火抱楷而啼頃之風返火滅卒年七十九張以誠
誌其墓

孫有聞

餘姚縣志字子長如法嗣子如法從貶所歸
瘴毒發如湧泉百藥不治有聞籲天祈代

及歿結廬墓側晝夜悲號深山多虎夜常繞廬而
不相害光宗嗣位赴闕訟父忠贈官賜葬母史氏
性嚴能曲意事之得其惟心史寢疾妻來氏絕兒
乳哺姑妻卒終身不娶後廕投光祿典簿遷戶部

主事以疾歸年七十而卒有詩文八卷

金思範

山陰縣志字養愚迎恩鄉人母病不能起因叩神額以身代見笑立拊膺大慟幾成狂疾

每日走廟中迎首但曰我代我代里人呼為愚孝子一日夢神語曰汝母得生汝當於某月日死驚寤與妻李氏訣曰母得生我死無憾但奉侍悉託於汝越數日果卒李氏事姑益殫劬瘁育二子守節四十餘年萬厯間縣令耿庭柏予粟帛旌其門

喻祿孫

紹興府志字希武嵊縣人事嫡母至孝母死結廬墓旁晨夕哭奠冬夜虎入廬號泣呼母

虎遂避去

薛廷玉

上虞縣志母患瘋攣跬步不離即渡便必躬自扶掖母歿哀毀不欲生不數月復喪父葬

後廬墓墓側巡按御史書孝思二字嘉之孫常生
登進士官吏部郎中孝如其子有老僕知其為庶
出之子生母早喪嫡母養之乃言曰主亦知有生
母乎備言其狀即驚哭仆地遂設主哀經晨夕哭
奠如初喪竟感
疾卒稱世孝云

朱鉞

山陰縣志年十三侍母病衣不解帶及母卒哀
毀幾於滅性隆慶五年父鳳翔歿擗踊泣血幾
死貧不能殮里人助其喪葬廬墓
三年墓生芝草有祥鳥集其上

周思觀

山陰周氏宗譜字賓廷父有七十二歲嬰末
疾醫告脈絕思觀封股進畧無起色夜屏人

命婦趙率子女侍床下戒母出已乃灑掃具香案
漏下將二鼓向天再拜祝引刀析肋下出肝如指

許和藥進之氣即續後病霍然子鳳翔
崇禎戊辰進士官至左春坊甲申殉難

袁自立

山陰縣志羊望村人崇禎間父賈參皮島遭兵死鋒鏑逾年計聞號痛幾絕星夜至島覓

父骸不得父舊主於方氏指瘞處遂掘視疑有他骨相混嚙指血逐一滴之見血入以衣裹骨肩負

徒步行五十晝夜始附舟抵家終身不如葦不衣帛且囑其子曰爾大父喪異鄉我不能送死我死

之日當掘地而埋勿用棺衾娶王氏甫九載遺子五歲不再娶鰥居歷四十年

童汝槐

舊浙江通志字德符會稽人隱居嵇山山寇竊發掠其兄去欲刃之汝槐大呼曰母殺我

兄我請代死寇義而釋之

夏子明

餘姚縣志鳳亭鄉農夫事父母甚孝母死爰舍墓側夜則往宿旦歸視父晝出力作歲時

以為常父死廬墓終身又有朱孔禮者傭賃養父父死毀瘠而卒

郁士渭

山陰縣志家甚貧父死異鄉乃托鉢遠行負父骸骨以歸又刲股救母奉旨建坊旌表

馬文賢

山陰縣志字仲孺性至孝貿易以給甘旨父早喪母六旬病劇禱於神不應割股創甚而

歿母愈妻金氏守節終身
萬歷五十年建坊旌表

陳垵

上虞縣志父旺素行善家頗豐裕一夕被盜鳴官盜黥毀賊反坐旺繫獄值巡按渡汀垵以死

白父冤遂投江殞命垵子耕年甫十三孤身覓父屍晝夜入祖獄中納素餼備匪艱苦會郡侯夜夢神示因搜牘見旺案察其冤釋旺以垵耕祀鄉賢

王鑾

山陰縣志字載阜母歿築室墓傍九載不歸親友有勸之應試者辭曰得安父母之墓足矣他

非所望也至老又築數椽於墓右人稱王氏風木庭子望久望大事祖母亦以孝稱

何兆三

山陰縣志馬塢里人弟出採薪虎突啣之兆三呼號奔救以篠擊虎虎舍之去弟得生兄

弟樵十餘年稍有所儲兆三曰吾老矣急為弟娶以延宗祀若有子即我子也弟遂娶生子而死弟婦悍不順其伯兆三凍餓而死

袁璽

嵯縣志西隅人補邑庠生母病割股父病又割股皆得愈父為讐寇所掠冒死入寇寨哀號搶

地求以身代其魁憫其誠釋之且斬讐首以謝同時有王舜周金庭鄉屠時申袁尚梁姚祖鼻皆封股救母

章訥

會稽縣志年九歲母張氏卒每慟即絕遂不火食惟啖果以活三年服闋慟絕始甦父兄強之

始進飲食終身茹素無喜笑容世稱奇孝年七十有五

朱元鎮

餘姚縣志 徽國文公之裔 母病危 萬元鎮年十五泣禱於天 願以身代 母病頓痊 父疾元

鎮年十八 封股和藥以進 病遂愈 父因字之曰孝先 後父歿 廬墓三年 猛虎不敢犯

任元齡

蕭山縣志 字九如 入太學 有聲 父朝諍 為郴州參軍 以桂藩工獲譴 有司連家屬 弟九齡

已被逮 元齡時客遠 方聞之 星馳詣獄 曰 家有長子 當逮我 備受酷刑 終無異詞 當事者憫之 為白

父寃 子雲蛟領順治丙戌鄉薦

陳泰交

上虞縣志 字曰章 山寇焚劫 父堯仁被擒入山 泰交挺身代父 賊不許 乘夜逃歸 鬻家產

不足 至以身質 曰 我父不歸 何由得錢 仍冒死向賊哀告 賊憐其孝 父子皆得釋

張惟明

山陰縣志 膺拔貢 例晉太學 乃棄科舉 一意孝養 父母歿 皆廬墓三年 有白兔來馴 之瑞

巡撫疏請
建坊旌之

李廷孚

山陰縣志字鳳山忠哀之裔幼孤貧受生徒以養母及壯任騰驤衛經歷遷廣西奉義州

判因母疾終養歷十六載割股療母建義學以成父志孝行決聞崇禎九年旌表

高朗

紹興府志會稽庠生父岱崇禎庚午舉人以甲申之難絕食將死朗前泣拜曰父素教兒忠孝

國不可無臣家亦不可無子遂奔向甬江兄澄出而追之曰予長子當隨父死汝次子當養母生朗厲聲曰死而隨父易貧而養母難吾為其易者言畢躍入水中死

張中

紹興府志宋新昌令珣之後明末山寇出掠父年逾八旬中負父二十里遁入西山知父意安

之遂以一身供饋粥不藉僮僕力逾數年先父卒妻俞氏代其夫終養里人稱為雙孝

王觀昉

紹興府志字子初山陰人官錦衣鎮撫父應

俱潰匍匐負父屍歸葬間闕數千里居家與兄弟

觀鼎觀猷輩日訓子姓以忠孝之義子國英會稽

張自偉

紹興府志上虞庠生山寇殺其父自偉覓父

往果得始獲驗誓報父仇踰年賊赴縣投誠自

婁墨林

婁永叔

紹興府志諸暨人父越凡為山寇

三人賊衆環攻其弟永叔翼兄以受刃兄弟同時

俱被害族人收三屍越七日顏色不變墨林兩目

如注永叔尚俯墨林背墨林聘朱氏未娶聞訃自

經人謂越凡死義墨林死孝永叔死弟朱氏死節

盡出
一門

國朝

厲世昌

紹興府志字周鼎會稽諸生父允讓好客遊明崇禎十六年鄉人有為南海主簿者邀允

讓與俱甫抵廣而允讓卒大兵下嶺南廣西道梗及事定世昌銳意求父骸而主簿家盡沒南海踪跡茫然世昌晝夜哭日禱於城隍神求夢及得夢乃凝思其意境而彷彿之果往得父棺于義塚塋下埋淺土中啟之骨已黝黑髑髏邊有髻簪舊物也齒指血灑骨間滲入乃大慟負而歸葬芝山之麓世昌年九十二以壽終雍正六年奉旌

唐允思

舊浙江通志字伯文會稽人母病侍湯藥足不履房閨者踰三載既屬續良久尚抱持母

不釋淚盡繼之以血著有
周易傳義詩經圖解行世

莫之永

紹興府志字予錫會稽人父可尚為靖江王
府掾卒於廣西值明亡絕音問之永年十八

牙身赴粵行八百里無人烟幾為狼虎賊盜所害
流離萬狀卒得父櫬歸鄉賢留祀冊之永母終廬

墓著有孝經

句解行世

蘇和驚

公舉事實字丹生號拙嚴餘姚人幼有至性
年十五母病甚籲天而泣刲股肉和藥進之

立瘳其後母思食瓜而方患下痢醫苦禁之不敢
進而母卒和驚遂終身不啖瓜每瓜時輒淚下承
睫初和驚父元璞建姚江書院祀王文成以諸弟
子配食之每朔望大昕伐鼓以儆衆講習麗澤承
聽者嘗數千百人元璞既歿和驚振其墜緒請邑
中黃宗羲為都講規畫措置秩然如經始時嘗注

過庭家訓詔子姓晝之所為夜必書之族有不才子見絕於父久矣和驚召與共食乘間為陳大義及情之不能自己者垂涕泣道之其人忽以顙搏地曰吾不可以為人嗣是父子如初二子滋忤滋忤俱成進士

楊學泗

鄉賢留祀冊字魯嶧諸暨庠生幼穎悟讀書輒能自解年十四喪父哀毀骨立勺水不入

口者五日啜粥茹素祭奠哀號三年如初喪母病躬親湯藥衣不解帶者累月病亟醫藥罔效學泗以鍼刺肉血淋漓下書詞告天願減已算以益母壽如是幾晝夜母病果愈居恒羞澁必躬凡可以娛母心者必竭力羅致里人稱曰楊孝子先是康熙甲寅山寇盤踞紫閭當富春諸暨要隘兩邑震驚泗奉母避亂偏處其地乃糾集鄉勇探其出沒盡得賊虛實適制府以勦賊至暨密陳方畧領兵

進勸殲厥巨魁報捷制府欲於疏內議叙學泗力辭曰老母在堂以功名故缺奉養豈子心所安酬

以金帛亦不受制府動容起敬年九十一卒

胡拱軫

山陰縣志年四十父母並八旬夜火拱軫起救方負母出火愈熾仍入救父樓傾身與父

同盡次早得屍以身蔽父體手護父面儼然如生妻周氏與子周同時燒死浙江巡按王元曦具題

建坊

周樂

山陰縣志字觀六山陰人家貧力學至性過人八歲喪母哀毀骨立父洪寧疾篤與妻金氏同封

股作糜以進疾乃瘳後數年父歿躬親舂鍤以營窀穸館穀所積捐置祭產以垂久遠性復好施遇族黨有貧困者多方調恤鄉里稱之

吳人紀

舊浙江通志字肇殷弟希聖字再希蕭山人兄弟自相師友嘗讀書於白鶴寺盜入其室

所得止衣襖盜怒而縛之欲沈諸水既而盜曰盍舍其一兄弟爭死盜義而兩釋之

竺王姐

嵎縣志二十二都人竺思聖義子康熙庚戌春里中猛虎為患思聖為虎噬從兄思文往

救被嚙死王姐奔與虎抱同溺水塘中尋脫走負父屍歸力乏死

俞慎憲

新昌縣志御史志虞子隨父官蜀中母呂疾晝夜視湯藥衣不解帶母歿扶櫬南還峽道

艱險勞瘁備至及父鼎革殉難南北道梗慎憲從兵火中載柩歸葬尤歷困苦

丁應正

鄉賢留祀冊蕭山貢生父病亟具疏通禱諸神願以身代家人莫知也越旬日身殞而父

疾竟瘳檢其書篋得疏稿情詞哀懇出於至性邑人嗟歎稱為丁孝子

趙萬全

公舉事實會稽人甫離襁褓父即遠遊迨長痛父不歸日夜號泣請於母往尋父緣崖涉

水七更寒暑抵大同遍覓無蹤遇父舊徒指往父墓一慟幾絕啟墓有金蝶自內飛出撲入萬全懷

中人謂孝感負骸歸里卜葬後廬墓三載朝夕哭奠作思親錄以遺後人

胡惟弘

公舉事實字大生會稽人父應麟患痼疾醫藥罔效惟弘自集方書晝夜侍側衣不解帶

者十五年疾漸愈雪夜父渴思食梨惟弘遍求野外不得欲入城而門已閉遠隍號泣忽有一軍士指負堞一舍引之至得梨以歸詰旦往謝堞下不復有舍惟闕忠義祠在焉始悟為神使父歿營葬

東湖躬負土石治隄植水橘數十丈人稱孝子隄年七十二卒有息吹堂文集

趙璧

題旌冊諸暨人歲飢賣薪負米以供二親父患肺癰越險採藥及卒三年廬墓側雍正四年奉

旌

胡廷贊

公舉事實字夢錫會稽人康熙庚子舉人年十三母周氏病篤到股和羹以進母即愈人

稱孝童授室後竭力奉養顚天以已壽益父母母年八十三父年八十八母疾衣不解帶者數月母歿同父卧寢六載及父病醫者欲以蟋蟀和藥廷贊先取二蟋蟀跪禱於天自吞之而後進母嗜鮮銀魚歿後見魚輒鳴咽不忍食生平潛心理學辨晰朱陸同異多所發明每朔望必集家人宣明家法雖盛夏不去衣冠鄉黨奉為模範

徐振

公舉事實會稽人父萬化家頗饒裕康熙甲寅秋逆猖獗偽將方德功嘯聚嵎邑執萬化索助

餉時振甫九歲奮身追至逆寨號痛於門逆威以軍法神色不變遂釋其父囚置散室中兩月後以

監役醉卧與父乘閒脫歸夜行晝伏越五日抵家
父避難遭寒濕左足生脫疽拇指將潰振為吮毒
月餘疽竟愈奉母顧孝養尤至振子威遠其母章
性嗜魚病中思食青魚羹隆冬無覓威遠跳入池
中捕之果得人謂孝感母卒廬墓終喪寢苦枕塊
遭沙土之毒諸兄勸之歸不從後父歿哭踊幾絕
嘔血數升復廬墓上而沙上之毒愈深兩足
至不能步履卒年僅三十二人謂徐氏世孝

張錦

題旌冊會稽人年七歲母病餬天求代者三十
餘日得愈母歿哀毀骨立三年不茹葷飲酒父

瑛官雲南浪穹知縣卒於任聞計徒步奔喪值吳
逆叛道梗錦披荆榛冒白刃扶櫬歸里親負土築
墳廬墓側朝夕哭拜雍
正十三年具題候旌

台州府

三國吳

鄧盧叙

三國志注會稽典錄處士鄧盧叙弟犯公憲自殺乞代

許孝子

名勝志許孝山在臨海縣之北四十五里舊傳有許姓者居喪至孝每一慟則羣鳥悲鳴

因以名之

謹按許孝子時代名氏俱失傳附錄於此

宋

郭琮

杜範郭孝子碑至道二年台州黃巖孝子郭琮年七十四事母張氏備極恭順勤奉甘旨寅夕

不懈遠妻子寢處母室不飲酒茹葷者三十年誦梵典禮佛塔積膜拜之數以七十餘萬計甘於勸

勞用祝母壽張年一百四歲視聽不衰飲食尚強
里黨異之聞於轉運使使馳詣其家召其母與之
生飲以醇耐嗟賞良久遂奏上太宗
覽而嘉之亟詔旌表其閭除其徭役

杜誼

宋史本傳字漢臣台州黃巖人事父母至孝父

剛嚴誼獨失愛惻惻不自容伺顏色而後進繼
喪父母號慟晝夜不絕卜葬負土為墳往來十餘
里日渡塘澗泥水沒胫雖大雨雪未嘗少止手足
戰裂血流以漆塗之每覆一畚必三繞墳號而後
去既葬焚舍墓傍負土終喪明年吳越大水山皆
發洛推巨石走十數里台州山最高而水又夜至
旁山之民居廬墓田畜牧漂沒者甚衆獨不及誼
邑人狀其事以聞詔書嘉獎事族父衍甚謹衍愛
之均諸子以祖垂象廕入官至贊善大夫嘗知永
城縣後通判梓州卒子揆

纔十六歲哭誼墓旁卒

鮑雍

平遇黃巖山水記縣西南篤孝山宋南渡後有鮑雍者徙居山下孝養其親以孝表聞

陳彛行

台州府志字清臣臨海人徽猷待制公輔之子紹興二年進士初宰欲大用其父彛行獻

書曰日暮途窮倒行逆施此最不可若爾則平生名節掃地矣父感其言遂以鯁直終

周彥通

台州府志黃巖人紹興中葬母藥山廬於墓下二紀乾道四年連夕甘露降墓松上陳守

巖肖狀以聞彥通力辭乃紀以詩

潘仁丑

赤城會通記字景商天台人少喪父哀毀幾絕事母至孝溪流暴漲母病仁丑尚穉能架

木以濟寇至以身捍母伏橋下母得不死母亡居喪盡禮邑令劉儼聞於朝乾道間表其門後人名

其坊曰旌孝橋曰孝義

吳沆

仙居縣志字仲元淳熙二年武科知昭靖二

項璣

虞集項孝子墓誌臨海項氏有子曰璣有至性喪親致毀過時猶孺慕身負土為塋廬居三十

年朝夕奠如初喪兵部侍郎商飛卿為立傳

許魯瞻

朱文中許孝子傳天台人嗣從子母徐守志撫之成立適寇逼城徐年八十有四卧病不

能起諭魯瞻行子伯通亦請肩輿避難魯瞻曰汝盡子情我亦自盡子道勿多言侍母不去竟死於刃元旌其閭曰母子節孝之門

吳處仁

赤城新志仙居人父為元軍所驅巡山呼子索銀以代死處仁趨軍語曰銀吾所藏也容

歸取以贖父及發審則已為人所符矣乃曰銀無存者吾以吾頭來代父死其弟困又請代兄衆義

之俱
獲免

陳參生

赤城新志黃巖人元軍至負母逃林莽中母曰我老病垂盡汝速去俱死無益也參生垂

涕不忍去遂
為賊所殺

陳思孝

赤城新志黃巖人德祐間元兵擾攘其母被掠而北莫知所之思孝日夜號泣與家人訣

誓不見母不還行七年至濮州得馬遂與母歸侍養益篤及卒居喪三年常在苫塊負土以葬鄉里因其濮州得母咸呼為陳濮州而不名

鄭憲

赤城新志仙居人景定進士官至太常博士德祐間元軍壓境憲奉母以逃歷深山中遇兵欲

刃其母憲抱持號泣以身翼之曰寧殺我遂俱遇害

顧王文

赤城新志仙居人德祐中元兵至台父被執王文奮捍之頸被數刀與父俱仆移時乃甦

自是支離
身無完形

元

張舜功

台州府志天台人太傅世傑之子自太傅歿於崖山奉母葉氏避迹海濱徙居台邑義不

出仕平居未嘗北面坐語及起兵勤王事輒髮豎背裂恨不同父徇國難母卒葬百家園廬於墓側

哀墨
終身

陶煜

輟耕錄元故白雲漫士陶明元諱煜弱冠時事元武神甚謹母病心痛歲瀕死者六七發醫莫

能愈明元每搗心嚼舌以代母痛一日危甚計無所出走禱元武前曰刳股割肝非先王禮今事急

矣敢犯死取一齒為湯劑神爾有靈疾庶其瘳荷
畢即引刃欲下忽有二童自外躍入曰母自損我
天醫也明元大駭仆地乞哀童子取案上筆書十
數字於几面擲筆二童子咸仆地隨呼家人救之
良久蘇乃降兒也叩之無所知視其書藥方也隨
讀隨隱即如方治之藥甫及口而痛已失終身不
再舉此事遂昌鄭元祐行狀會稽楊維禎誌墓皆
不書非逸也畏譏而削之也雖然動天地鬼神莫
大乎孝或如俞跗岐扁依馮精魄以遂孝子之請
也不然何有所謂天醫乎余得其實甚詳故寧受
左氏之譏不敢沒明
元之孝會稽張憲撰

杜文裕

赤城新志字希大黃巖人捕盜有功補台州
大閭巡檢以母病辭職歸養復調寧國之三

溪乃訴於江浙行省乞便養時母年九十三浙東
憲副王侯行部至黃巖聞於朝建孝行坊以旌之

陶忱仲

劉基孝友堂記臨海人生八歲而母卒繼母弗能愛及長娶吳氏相與謹事母終不能容

乃與妻出居於外勤苦織績以為食朝夕入定省弗曠而父與繼母自占其產不使忱仲得與久之家日匱父且老繼母所生弟妹皆無以具婚嫁忱仲乃迎父及繼母於已養以其資為弟娶婦嫁其妹咸得所由是繼母大感悟忱仲事益虔門庭之內穆穆如也子凱讀書有文行以經學教授弟子以其束修之入佐父治喪葬供祭祀悉如禮上世墓域有奪於勢家者咸贖而表之凱無兄弟惟一妹適顧氏早卒凱為育其子女以成人故鄉黨之稱孝友者莫不曰陶氏父子云

陳杲

赤城新志字孔英叔夏之子至正壬辰夏四月方國珍亂台州趙宜浩率兵禦之賊奔潰四出叔夏

避難過遇賊將殺之杲伏父身上願代死賊斫之弟多避復肉袒請代兄身被數創死而復甦後為山東

便運

阮祖立

臨海縣志字立道父患銅疾竭誠醫禱與其婦躬為浣滷扶持坐卧者二十餘年一夕隣

家失火父不能起祖立負之出疾呼其婦挾姑以從比出門則家已灰矣乃僦居僧舍供養無缺至

正中詔旌其門

薛良能

赤城新志寧海人元末羣盜起其父宗道遇害良能痛父死非命散家資養死士為父報

仇無何賊復至良能適病即率鄉兵逆之與賊戰不利左右勸良能走良能曰父仇不共戴天今不能殺賊反自遁以偷生耶今日之事有死而已遂力戰而死

周應顯

天台縣志字伯煥父為人所害散財復仇方正學為作復仇記生平喜吟咏自號靈虛山

人洪武中
徵聘不起

曹潤

台州府志字宗澤父進卿為委吏方國珍既敗明兵入城索戮遺黨進卿儀狀甚偉校卒疑而

執之家人驚逸莫顧潤冒白刃以身翼父哀求懇至傾家資與之乃始獲免

明

謝溫良

赤城新志字伯遜黃巖人至正間客昌國奉母陳氏以居陳病瘕封股肉作糜以進母輒

差時昌國方內附會蘭秀山盜發海上朝命殲之昌國人悉竄匿山谷間溫良獨侍母不去盜義而釋之尋奉母還黃巖越一年往取故囊比至忽夢母盛飾坐堂上亟棄囊歸母果疾又一年母復病靡手足痿痺不自舉眠食起居一出其扶持者凡十三載

趙孝先

臨海縣志名次起以字行洪武初為國子生父戌京師孝先告祭酒以願代狀不許訴於

禮部事聞詔許之孝先喜不自勝即變服以行士大夫競為詩以送方遜志為之序戌滿仕實抵教

諭祀鄉賢

戴彥信

仙居縣志名原敬父養元饒於資與比隣陳某有隙陳生籍沒詭言寄緇養元所遂并繫

獄彥信痛父冤訴於官願以身代詔釋養元而彥信竟沒於獄人人嗟悼之

林惟深

台州府志字思源資性明敏論事當理洪武初父法當戌惟深白於官代父以行王原采

深加嘆服謂思源與方希直並駕特所少者問學耳

陳圭

明永化類編黃巖人父叔弘為警人告罪當死圭訴所司曰圭不能諫父陷父不義圭罪當死

幸原圭父使自新事聞上哀其孝欲赦叔弘刑部
尚書開濟奏曰罪有常刑不宜屈法啟僥倖路遂

聽圭代父死叔弘
遂謫雲南而死

陳顏

台州府志圭之族洪武中倭寇登岸居民驚駭
散匿山中顏母葛氏老且病顏負而逃力不能

勝寇追及之母曰我病死在旦夕汝當
自圖俱死無益顏不忍舍遂俱遇害

朱煦

明泳化類編台州人父季用被薦為福州知府
洪武十八年詔天下盡革今歲以上官吏為民

季用視事僅五月以例起入京論罪作城役嚴償
重日數十緡已而季用又病痢資力弗任旦夕乞
死煦懼不敢離左右復戒二弟共守不少寐季用
得不死時告枉甚重令益嚴告而謫戍遠方及被
極刑者凡數人煦謀於父僚友同役者曰吾無術
以脫吾父訴不訴皆死萬一吾父由訴獲免雖戮

死萬萬無憾遂陳其情所司以聞上赦季用復其官同時緣此得免復官者十有四人

趙公佐

寧海縣志父糧役坐罪公佐兄弟四人議代行未決公佐於次居三獨奮曰以年序少者

當行而吾弟子幼可就逮者惟我遂就獄減死輪作終身

余啟

黃巖縣志字元明幼失怙事其母鄭克盡色養時家有滇南之役二兄議行未果啟毅然曰吾

兄皆有嫂氏不可行吾當行備歷艱苦閱三年乃返後授延平知事多異政

王鐸

明孝友傳黃巖人隨父顯避賊顯被執將殺之鐸亟趨前請代賊遂殺鐸而釋顯將

危貞昉

宋濂危孝子傳臨海孝子危貞昉字孟陽父孝先洪武辛亥進士官麟遊丞再遷陵川生

法謫役江浦縣貞昉時為郡諸生聞之奔訴於郡守求代守以其名缺學籍難之貞昉號泣於庭左

右為之言乃如其請即日上海詣京師伏闕上疏
曰臣父陵川丞不幸絀吏議輸作大江之濱筋力
向衰不能執事大母范氏春秋逾九十旦旦念之
恐染霜露疾無以遂菽水之忱致抱終天之憾臣
犬馬之齒方殷願代父作勞使其歸養即死無恨
疏奏上惻然從之貞昉乃解儒衣易短製欣然就
役質體尫弱不勝負
任之苦越七月病卒

何

綱台州府志字維常臨海人永樂初有誣搆大獄

而誣服論法應死綱懇惻以情懇於朝得謫景州
居無何竭力謀免父歸歸而喪明綱扶持調護不
離左右愈久益力後補邑庠生貢入
太學六館之士聞其名咸推重之

趙溥

赤城新志寧海人父仲年為臨城令吏抵法誣
仲年與知不能辨謫役江浦溥痛父非辜為書

詣執政自陳格弗奏溥走闕下撻登聞鼓上召問
狀溥已三日不食且受提曳惕息未及對上以為
偽下大都督府詰問都督武人不察其
情榜掠之誣服奏杖一百徙邊扶出死

陳蟾

萬歷寧海縣志字懷明西隅里人父國華南寧
知府部使者誣其淹禁罪囚律應死蟾奮曰父

死吾生奚為乃擊登聞鼓乞以身代御史以
聞上佯試之蟾辭色不變而執益堅遂赦之

陳昂

赤城新志寧海人父濬凱為桂林稅課司大使
為吏誣構生繫謫役江浦尋自江浦徙京師昂

從行代執役手足胼胝而事父無違色日食不給
則傭作於市至暮得升斗以養父有蕪食儲則又
代父執役如是四年父閔之謂曰吾老分且死汝
歸養而母徒俱死無益也昂泣曰父死昂亦死爾
歸將何為竟
相繼以沒

方孝聞

史槩字希學孝孺同母兄年十三喪母輒稽典禮蔬食水飲越三年及父卒居宿於外祖

母亡亦如之每一號慟聲盡氣絕嘔噦出血杖而後起於是寢成羸疾行步偃僂守禮益堅徧學五經而邃於易精求聖賢旨趣篤實踐履文章理深意遠議論甚偉從學者甚衆孝孺嘗曰某所以麤知斯道者非特父師之教實亦吾兄之訓也弟孝友字希賢孝孺庶母董氏出孝孺罹難亦就戮

馮銀

馮沉

台州府志臨海人銀字純端景泰庚午舉人父卒哀毀盡禮服闋成天順丁丑

進士觀政禮部特疏乞歸省母竭修滙之養依戀不忍舍母促之就官乃攜季弟沉同行官刑部員外郎人莫敢干以私沉字瑩端乙酉舉人時銀已得貤封遂慨然曰吾所以含溫清於五千里者為未有以報先人於地下耳今邀國恩獲追贈北堂白髮可不為速存計乎遽引疾歸後登成化壬辰

進士補宿松令逾年邑大治以艱歸號慟過禮釋服遂不起人謂銀以養棄官沉為喪滅性皆無媿

孝子云

丘鐔

赤城新志黃巖人早喪母事父備極誠敬父年

髻穢汚必躬自澣濯父卒遺命葬祖塋之側塋去家百餘里鐔悉力營葬如父命

蔡大治

秦鳴雷孝格傳字朝佐一字廬夫臨海人幼從竹江趙淵遊博究經史動順親意里稱孝

童父患疾暈母瘋疾家病傭書以供甘旨丙夜吮痰揉體嘗湯藥扶起居櫛沐澣滌備極艱辛踰兩

紀如一日父病危號天仆地聞空中云香灰可救輒汲水煎汁進父飲未半倏天坼祥光照戶父病

立瘳後父母繼卒蔬水骨立寢喪次各三年庭中紅榴忽發白華負土為墳鄉人助石營葬年近九

終十

張壽鵬

太平縣志高浦人嘗從父定一以州判之任和州至臨安道中父卒壽鵬奉柩歸葬廬墓

泣血不止有芝生於庭郡守以聞詔旌其門建孝感坊

項茂

黃巖縣志字仕昭景泰間貢入太學父歿執喪甚哀既葬廬於墓側事聞詔旌其門

許柱

天台縣志字邦興家貧奉親甘旨獨豐處昆季友愛無間親亡廬於墓不問家事者六載

陳垣

臨海縣志字子崇號一厓童時喪父哀毀如成人既終喪攻舉子業弘治壬子領鄉薦授涇縣

教諭以行誼廉耻率諸生轉國子助教甫三載當道論薦例得臺諫以母老願就閒秩擢汝南長史居無何上疏乞歸養再三諭留乞益力乃諭以考績請封可以悅母遂弗果歸已而憂念成疾既卒

諄諄語曰我不孝我不孝
卒年五十四祀鄉賢祠

卜懷

明孝友傳寧海人父早卒母教之甚嚴常課其
業輒以杖擊之母年九十六卒懷執母杖而泣

曰安得母復教我耶祀其杖於母側遂廬於墓有
司上其事詔旌其門後歲貢就銓以孝行擢首選

授鄖陽
府通判

馮學經

臨海縣志字綸卿郡庠生母卒哭泣擗踊不
欲生及葬結廬墓側茹素席藁朝夕哀號三

年不抵家墓上產芝草數莖有鹿
馴擾其旁學使獎之卒年七十八

陳紀

台州府志字德廉居父喪晝夜悲號寢處苦塊
因得疾其妻令小婢餽藥叱而出之既祥且禪

猶疏食水飲邑佐以其子從學持卮酒相勸見淚
下潸然遂止迄喪母廬墓三年一夕甘露降於庭

天順己卯領鄉薦通判寧國府清節凜然以廉吏稱卒年七十二

應昌

分省人物考字克盛仙居人走京師白母苦節得表閭會日者言母壽當盡即斷酒肉徒步歸

省比抵台母固無恙而兄病疫甚劇晝夜走山谷穿虎豹羣檢藥物仕為分宜尉聞母訃不食五日比葬廬墓得痲疾衆舁之以歸終禪苦塊遇二親忌日輒號泣不食及年八十家人叩首請始一食家甚貧竭力營宗祠以祀先人族里感其孝率慕而行之年八十四終子良官編修

張世榜

黃巖縣志字廷晚縣學生嘉靖戊午倭寇登陸世榜扶父避中道遇賊欲殺其父世榜哀

懇願以身代賊不從世榜脫巾擲地戟手大罵奮前擊賊遂遇害哀令應祺上其事

李翀

台州府志黃巖人母陶氏遭危疾翀刲股作羹以進母疾漸蘇比卒苦塊如禮自號其室曰思

齊

徐永治

台州府志字用禮天台人弱冠父簡正為族
人誣構繫獄而卒永治誓復仇一日仇出執

鋤立道側若治田狀候其過而殺之詣父
墓告曰仇已復矣即至官伏罪卒於獄

王士業

臨海縣志字建叔號乾齋襄裕少子性至孝
念父母春秋高諸昆咸食祿王朝終身願依

子舍以盡色養廕授詹事府主簿天啟辛卯陞郡
司馬聞父計出都十八日抵家髀肉騎傷見骨血
透重茵脫韁時不自覺也擗踊號絕週一夜方甦
及葬廬墓三年哀毀骨立竟卒於墓側子立墀字

伯形亦
以孝聞

裴忠廉

天台縣志字忱赤九都人母病目一年服藥
無效每日以舌舐之母目復明邑令旌其門

葉維藩

臨海縣志字价叔父官楚府典膳維藩念定

孝許之扶持還里盡瘡瀝之歡以子貴贈奉直大夫

陳守約

舊浙江通志陳臣謙函輝子疾孟子守約判股以療之臣謙聞而嘆曰生為忠臣子死為

孝子父瞑目無憾矣遂卒

柯澄

台州府志字廣生黃巖人六歲失恃事繼母章以孝聞補邑增生教行博文督學三舉優行

國朝

管迪

公舉事實黃巖人父景煦早世母解氏方娠矢志守貞及生迪七歲能事母以孝稱年十三知

父葬所在離家十許里外日往省視夜則趨歸侍母一日途晦遇虎迪惶怖仆地虎搖尾而去里人

親見其異順治丁酉海賊犯縣治城破掠居民甚夥迪負母避梅梁港遇賊迪身冒白刃泣跪曰寧殺我母傷我母賊傷其右臂而去得免母歿哀毀骨立既葬廬墓終身

洪日慶

台州府志字初明號監茲臨海人生未週即喪母王氏事父暨繼母甚孝與異母弟天慶

友愛每聞人言及所生母即嗚咽流涕喪耦殯郊外為盜所發當道窮訊之父語之曰發棺重律誰肯吐實以仇儼故累無辜其何以安日慶即赴邑述父意願割痛屈法以全隣里道府聞之咸謂父真仁人子真孝子父疾嘗藥侍寢衣不解帶既卒哀毀骨立葬後廬墓三年子七人若臯登乙未進士封日慶戶部郎中卒年八十有七

金華府

秦

顏烏

異苑東陽顏烏以純孝著後有羣烏銜鼓集所居之村烏口皆傷一境以顏至孝遂名縣為烏

傷王莽改為孝烏以彰其行

三國吳

斯敦

金華先民傳烏傷人父偉為廷尉失議當坐死敦叩閭泣血請以身代吳主嘉其孝赦偉罪仍

旌其門俗因呼敦葬處為孝義塘

晉

許孜

晉書本傳字季義東陽吳寧人孝友恭讓敏而好學二親沒柴毀骨立杖而能起建墓於縣之

東山躬自負土不受鄉人之助以方營大功乃棄其妻鎮宿墓所列植松栢迨五六里時有鹿犯其松栽致悲嘆曰鹿獨不念我乎明日忽見鹿為猛獸所殺置於所犯栽下致悵惋不已猛獸即於致前自撲而死自後樹木滋茂無犯者元康中郡察孝廉不起巾褐終身年八十餘卒邑人號其居為孝順里咸康中太守張虞上疏詔旌表門閭其子生亦有孝行圖汝像於堂朝夕拜焉

唐

陳太竭

浦陽人物記縣人武鼎之子親亡即墓手藝松柏終身哀麻形質枯悴哀哭弗輟每奠米

看鳥鳥不啄

應先

唐書孝友傳先東陽人冊府元龜父亡廬於墓側有芝草連理樹詔旌表門閭

唐君祐

唐書孝友傳君祐東陽人冊府元龜唐睿宗先天二年江西道按察使奏君祐喪母哀感鄉

曲廬於墓次有
芝草三莖生焉

馮子華

唐書馮宿傳宿父子華婺州東陽人廬親墓有靈芝白毛號孝馮家

五代

何千齡

浦陽人物記浦江人孝友著稱同居四世貞明六年旌表其閭

宋

樓蘊

呂祖謙樓蘊墓誌字季發義烏人母喪廢掃沐鹽酪不入口結廬墓左繞塚哀號塚下耕者為

之墮淚負土築墳日自課三十肩塚高數仞鄉人合詞請於郡邑刺史遣從事勞之謝曰此人子之

常不願賞陞里強之不可歲時祭享不用釋老楮幣終其世巫祝不至門人稱曰孝子龔應之請於

朝從祀
顏烏廟

董少舒

金華雜識字師仲蘭溪人篤行著鄉黨父亡負土築塋廬其左有靈芝生紫葢黃幹時睦

寇壓境妄稱聖公能役陰兵少舒援唐陳碩真與妖伏誅事綴文示衆衆悟相率抗賊所俘萬餘人

金景文

純孝鄉錄字唐佐蘭溪人祖父患瘡醫不療景文雕飾佛像虔禱即瘡父患疽祈以身代

父疾減葬母廬其左天光射墓五色爛然續廬父墳食蔬誦梵鳥鼠環聽几旁無怖狀風雹環四隣

獨不入其舍淳熙間郡守韓元吉以純孝名其鄉

陳天隱

金華雜識蘭溪人大觀時以孝弟睦姻任卹忠和八字旌其門金華先民傳字君舉父兄

早喪事母馮以爲孝稱母卒卜葬於三峯之陽時六月赤日如焚先期待乞雲霧覆棺已而果應葬畢雲散人皆異之築廬墓次坵而蔬食終三年喪宣和五年郡守范之才表聞詔卹其家列祀鄉賢

鍾宅

金華雜識浦江人淳熙中母病宅剔肝和藥以進病尋愈從子明亦封股療母及明有疾明弟

滿又封股療明皆疹縣令李知退義其事爲代輸租賦三年宅子文厚文廣尤友愛文廣妻求分文廣即出之當時有金智深者母得危疾亦剔肝爲餌母疾愈

申大度

嘉靖金華縣志與弟大康友愛甚篤既歿合葬任公嶺朱文公熹題曰孝友二申君墓

呂皓

金華先民傳字子暘永康人出粟賑濟受知於倉使朱熹薦諸朝補郡文學淳熙中舉上禮

部會父兄爲怨家誣構逮繫大理獄皓叩匭上書理其冤願納所得官以贖死且言無使聖世男子

不及漢一綖紫女子為歿身恨翊日下都堂議宰
相白無例孝宗曰此義事安用例由是其父兄與
連坐者五十餘人皆得釋再試禮部不第隱居桃
巖山講學克己孜孜不倦父母既歿茹素三年廬

墓以終喪嘗自作雲溪逸叟傳
以見志弟源亦以孝友見稱

李悅

天啟東陽縣志字公愉幼與兄懷避亂匿灌莽
中懷為賊所執欲殺之悅急出曰此吾兄勿殺

吾請代寇欲併殺之賊首出召問曰汝何不惜死
悅曰非不惜死顧兄有弱妻幼子我幼且無能為
故願以身代賊義之遂兩釋焉復給以識號使佩
之曰有殺汝者以此示之由是兄弟並免於難

徐文震

嘉靖金華縣志字伯光尚義好禮數
世同龔淳熙十年詔表其居曰義門

呂源

萬曆金華府志字子中執親喪哀毀踰禮苦塊
三年病革時兄遊江陵仰天大號曰不及見吾

兄一語而訣吾目不瞑矣人莫不哀之郡邑以孝弟聞於朝贈通直郎旌表其門

賈南金

萬厯金華府志字國寶金華人家貧傭書以奉菽水端平三年登進士第仕至饒州通判

二親繼歿晝夜哀號遂以喪明旋排疾卒

周祖仁

金華先民傳義烏人親喪廬墓朝夕號慟甘露降於墓柏人稱周孝子

鄭綺

宋史本傳婺州浦江人善讀書通春秋國梁學以肅睦治家九世不異爨揭溪斯鄭氏孝友傳

綺字宗文事親孝父以非罪繫獄當入死綺欲見不可以頭觸園扉出血上書請代郡守錢端禮偉之為直其事母張得未疾綺保持若嬰兒但登園必抱就之三十年不懈張好飲溪泉天旱泉竭澹之弗能得仰天大慟水忽為湧張死欲葬適天雪方凝綺哭禱甚哀塚上雪一夜獨先釋人以為孝

感綺妻丁與姑許語阮與似不相能皆出之一日
無疾召子孫列立先祠下歃血誓曰吾子孫有不
孝悌不同釜爨者天實臨之言已遂終後子孫九
世同居自綺始乾道中有司上其行賜號曰冲素
處士

鄭德珪

鄭德璋

宋史鄭綺傳綺四世孫德珪德璋
孝友天至德璋素剛直與物多迕

仇家陷以死罪當會逮揚州德珪哀弟之見誣乃
陽謂曰彼欲害吾也何預爾事我往則姦狀白爾
去得不死乎即治行德珪追至諸暨道中兄弟相
持頓足哭爭欲就死德珪默計沮其行遂紹以無
往夜將半從間道逸去德璋復追至廣陵德珪已
斃於獄德璋聞之慟絕者數四負骨歸葬廬墓再
期每一悲號烏鳥皆翔集不食德珪
之子文嗣幼病痿德璋鞠之如已子

朱環

金華先民傳字君玉義烏人仲父桂養為子桂後生璧因外環環益孝謹時境內多盜桂有白

金數百兩與璧窖藏之壁夜發去反誣環桂怒褫環襦袴立雪中一晝夜不使去環恂恂謝過無一言辨其冤桂死遇壁益厚環善讀書

寶祐中嘗舉進士年八十六終於家

徐文震

明一統志金華人尚禮好義數世同爨德祐年間宰相留夢炎署其門曰金華孝友之家

元

戴珵

宋濂戴府君墓誌字君玉浦江人曾遊浙西誤傳道卒母朱哭之喪明珵歸露禱於天摘冬青

葉浸水舐之目復明朱歿繼母傅生子惠秉家政資產一聽惠取勿與較年八十四終

朱元

宋濂朱環傳元字子初性警敏絕人元初有盜數千起縉雲過永康置砦峽源山抵元家甚邇

盜將劫元父環為謀帥元聞遽歸告父速避寇不
聽復涕泣諫環罵曰豎子不解事江南內附久誰
敢叛耶元自度賊縛父去則是父從賊雖百喙莫
能辨執若殺賊自明乃與役夫傅參謀執刃伏垣
下或止之曰賊勢張甚汝不畏作菹醢耶元曰吾
知有父爾若得白父以無罪雖萬死不恨會賊偵
騎至竟斫殺二人梟首市中以血手
入示父乃負之逃賊平父得無罪

羅時可

揭傒斯羅孝子墓誌字以中金華縣人母劉氏卒卜地子午谷扶柩葬焉葬畢伏墓一慟

而卒時年二十五天乃昏慘羣鳥哀鳴邑令上其行部使者以聞於朝

明

鄭欽

分省人物考字子敬浦江人年十七父得羸疾醫言人血可治輒刺膚血以和藥既沒痛悼終

身母疾凡三藝頂灼臂以額天撫弟妹極盡恩意
續完兄太和所著家規共七十三則自號青蓮居士

鄭淵

獻徵錄字仲涵浦江人母病踰年日夜抱持之
積憂至疽發於背猶跪進湯藥母病革思得瓜

食食已乃卒每瓜時淵輒涕泣終身弗食瓜居喪
哀戚兩耳皆聾後居父喪哀毀骨立凡遇父母諱
日前期齋七日至日號慟
行禮如初喪沒身不變

郭用賢

天啟東陽縣志洪武初父仲達以才能舉典
倉事奸黠者伺其隙中傷之法當死用賢奮

然曰吾父志行衆所共知苟為所屈安用我為直
其冤於有司不得遂以身代死鄉人憐之為立廟
祀同時有陳文敵者父被逮赴京文敵求以身代
不遂乃刻木為像晝夜置懷中終身齋素遇忌日

則望空遙拜哭泣盡禮哀如初
喪五十餘年人未嘗見其笑

傅致柔

嘉靖金華縣志字守剛少遊吳立夫之門與
宋濂善父病出市藥溪水瀑漲乘亂流以渡

如有物負其足者得藥歸父旋愈後父歿諸兄溺
浮屠言將葬以火致柔哭泣既絕不及救乃拾遺
骸篋中且逸去諸兄奪而投之淵復入淵得之裹
以哀服奔宋氏託其友置棺以殮傭書得值買地
葬之廬於墓貧甚至并日一炊御史
潘黼薦於朝辭不赴既卒濂銘其墓

鄭洧

方孝孺貞義處士傳字仲宗浦江人洪武中詔
天下度田為圖命太學生董其役未幾有以賄

敗者連坐大家多處死時主家政者兄濂也當連
京師受重辟洧奮曰此行必不反吾兄年八十矣
而使之白首就吏乎吾當代行遂詣理自
誣服竟以其年七月死金陵鄉人哀之

田奐

家濂田氏哀慕詩集序同郡田君奐篤美有馴行母徐氏卒哀號慟哭將欲無生既葬遑遑焉

如有求而弗獲人或勸其還舍奐曰吾母在此奈何離母而去因結廬墓側人復勸之曰廬墓非古與號曰吾恨不死從吾母於地下古與非古弗暇計也於是寢苦枕塊疏食水飲終三年而後歸鄉士夫聞之咸為太息作為篇翰以美之

張壽祖

金華先民傳字伯樗浦江人父早喪母患乳核往苒二十年成癰忽潰壽祖吮出其毒遂

愈母年九十餘寢疾累歲壽祖侍奉不懈母亡哀毀骨立洪武二十五年以耆老召歷事戶曹除光

縣化知

盛本源

明孝友傳蘭溪人洪武中兄本道被鄉里誣誤罪當死本源謂其兄曰兄未有嗣理不可

死我子女四人願以身代兄在
我猶不死也遂毅然就吏代死

周道觀

兩浙名賢錄字景還金華人精於醫事父母
極孝洪武辛巳以薦授魯府良醫正年八十

六乞休王手書全孝二大
字以賜之人稱全孝先生

宗祉

明實錄金華縣人父歿哀毀廬墓三年母盲不
能視物舐其翳膜母目復明後自太學生仕至

瀘州知州表
其門曰孝行

唐熊

萬厯金華府志蘭溪人性澹泊躬修孝行母鄭
年老失明起居必敬扶持之不離左右伯兄以

刑部尚書養親歸熊恭敬承意代服其勞母氏安
其養焉家貧幾不自給處之裕如雖兄陟上卿益
自勵所守終身不殖家產蓋
無於陵之避而有仲子之風

趙滄

東陽縣志本名為滄字宗淵幼有至性以孝聞既失恃繼母溺於所出滄每出遊學虐其妻鎖

之室中百方窘辱卒無怨言弘治辛酉領鄉薦值母誕辰遂不赴公車復盡推田廬以與諸弟而以舊居自處母病瘋朝夕侍湯藥不倦母悔悟諍亦止後父母相繼歿哀毀兼至友愛二弟不良人稱之曰趙王祥

黃嵐

萬厯永康縣志性孝友會兄崇上輸課廷獻置重辟繫獄嵐聞往省以貌相肖代繫赴京遇宥

獲免

胡柳

萬厯湯溪縣志字宗質兄以仇誣陷逮赴京師柳念兄老疾抱持慟哭請以身代顛官官憐之

竟從其請代戍遼陽十三年後以恩宥還鄉侍兄益謹年七十餘卒

黃潏

續浦陽人物記九歲喪母朝夕哀慟得喘疾年二十三父當役潏請代行父憐其病遣兄滋往

潏曰寧有兄遠赴萬里而弟晏處室廬者乎固請父重違其意許之即詣省領文去間闕疾劇竟死於途滋往收骸莫知其處逾年始得其族人洵字永叔隱居著作尤工書體髫年父死非命悼慕終身號抱戚子又培字仕茂出洵之門

省學好古亦以孝聞俱有潏之風焉

胡繁

湯溪縣志兄為鄉民所誣謫戍遼陽繁以身代後恩宥還鄉年八十卒

張應沛

續浦陽人物記字汝霖父元京早逝居喪哀毀逢忌辰輒竟日流涕奉孀母備極承歡二

弟潏澤襦中撫之成立合巹四十年以貢授太湖簿陞貴縣丞數月間仲弟故恐傷母心急告歸哀痛成疾卒於途喪歸遠近畢赴楊太史守勤為表其墓曰孺孝

邵蒞

武義縣志父寢疾背負共卧起者三十年父年九十餘歿蒞亦七十餘哭至喪明廬墓二年卒

應綱

萬曆金華府志字恒道永康人幼喪父其母胡守節撫之成立補弟子員綱事母老母有疾或

不食綱亦不食成化七年省試回經錢塘覆舟人多溺死綱以母老寡居為念水中若有援之者獨得無恙人以為孝感後任歸德州訓導奉母就養孝愛逾篤母歿水漿不入口者三日廬墓三年弘治十七年旌其門曰節孝

王世名

王世貞紀孝子王世名事武義諸生父與族子口語相失族子倚之牆築其願傷死時世

名猶稚宗人捐族子之腴五十畝償世名世名飲泣受田供賦役外手籍其數市金封之歲以為常口不及父事晝夜讀書補博士弟子至婚娶舉一子教弱弟使有成立其於族子以兄禮禮之無間

每歲旦謁父主前卜之不吉則掩泣而退至卜得吉乃走治工鑄一利刃鵠姓名於背伺族子飲醉歸袖刃揮之立死囊其首歸於父主前曰幸不辱拜辭其母曰弟壯可養有孫不鬼餒矣疾趨至縣出袖中贖且出其藏金令義之繫於麗譙之上謂族子毆世名父死世名殺應斬之人當減徒然法必檢父屍而後獄可成世名聞之自譙投而下敗面折肢曰吾往者不聞之官懼暴我父骨今乃為我暴父骨也吾杜吾口矣自是絕不食積十日死令嗟賞久之為祠以祀孝子

傅寬

續浦陽人物記字孟宏少負膽智甫冠父遭仇家中以重辟寬請代行父憐其少不許寬曰縱

榮幼女能詣闕上書矧男子乎遂往訊榜掠無完膚猶伏地咄咄訴辨卒白其寃後御史廉狀壯之為棹楔以旌其孝孫文理粵衛叅軍聞母病掛冠歸封股療母愈遂終終養不出從弟亨蒙慷慨仗義

亦有理風

黃瑋

續浦陽人物記字均璧父陶以累當赴京瑋請代行吏議充廣西軍瑋任之告歸取行資瑋子

保字孟安又請代既而從征蠻寇沒於陣初保娶陳氏甫歲餘生子崗未週而保死守節育子教之

成立云

黃謐

續浦陽人物記字君靜父隆為仇家誣搆當詣京師謐毅然往白而卒子良昶字孟舒痛父早

世寢食不忘或語及輒泣然流涕事母石極甘旨之奉至老不衰母年逾八十卒兄良嗣以非罪械

繫至京良昶從行詣理代服法司義之俾贖其罪而歸人皆稱其賢

趙枋

崇禎浦江縣志母病三年衣不解帶既卒枯寇入境人皆逃匿枋獨扶柩哭寇亦哀之不犯

尹振

嘉靖金華縣志母周氏患瘋時振年尚幼保扶不離膝下稍長孝養益篤朝夕侍養躬滌溺器

母亡哀傷成疾而卒

湯伯瑜

武義縣志十歲喪父貧不能葬稍長徒跣負土以葬其母王氏苦節六十二年足不踰閭

織絰自給伯瑜傷母志奉甘旨惟所欲母患癰法宜潰以砭勿忍口吮之赤黃泝流而愈又暑痢掖起藉眠不解帶者數月母年八十七終廬墓三年學道巡按給扁旌獎歲給粟帛

項思諭

崇禎浦江縣志傭樵以養寡母甘旨竭力母患瘋疾三十年歲歉難給賣妻以終養迨歿

廬墓終身哀麻云

楊天龍

崇禎浦江縣志鐵工為業母病聞割股可瘳即引刀割以少復口銜鐵鉤摘割方寸和糜

以進母食愈後三年病如初復割復愈有村豎陳應相聞其風母病藥不效亦割股療之愈

施伯穎

崇禎浦江縣志字長孺幼善屬文性尤至孝七歲從父延賢讀書於杭州之仙林寺父患

疫垂斃伯穎泣禱迦藍夜夢一青衣指寺後桃樹云此杪能活爾父覺取進服之立瘥母陳寢疾割股療之者再竟以股瘡甚發痘疹遂不可治族人哀之

朱助

金華雜識字士貞湯溪人母卒廬墓家燬於火而師菜堂扁出煨燼若新盆柏蒼枝致黃烏卵

育馴而不驚家有母犬老瘡病瘡其兒啣食食之人歎為孝感三異

徐文敏

金華先氏傳武義人父早卒母朱遺腹生文敏及長事母孝母患瘋疾百方醫療不痊乃

斷酒肉每夜叩北辰祈以身代越四年勿懈忽一夕夢老人示以方如方劑藥母服而愈其孝老而

彌篤正德間朝廷旌其母節後十年知縣張沐核其孝行以聞未報而卒其母年逾九十乃終

王晁

金華雜識字公亮東陽人居貧養親曲盡孝道母卒廬墓三年邑令張立嘗雪夜往視之藉苦

單薄晁僵卧其上齒相擊有聲而鳴咽號哭不自禁立大歎賞

吳滄

萬歷金華府志東陽人幼失怙比長竭力事母母沒廬墓三年又以早孤不得廬父墓復補三

年嘉靖初北上乞表母節至楊子江值颶風大作舟欲覆滄泣曰死不足惜吾母之節泯矣叩頭額天風頓息得免抵京疏上詔旌其母後士民以滄孝行具聞亦得旌表

潘琢

金華雜識字時循蘭溪人母患瘋瘰琢衣不解帶痒疴疾痛隨意搔摩梳洗水火皆身理之母

久卧思起乃制軟輿與弟昇之惟母意所適與之遊行如是七年母死廬墓者九年

徐克仁

萬歷金華府志東陽人母疾朝夕奉養歷寒暑衣不解帶竭誠醫禱母病尋愈後以壽終

克仁哀毀骨立葬母誠求結廬於墓晨夕拜奠三年悲號不置後父病醫禱如母及終亦廬墓三年

有斃蛇馴兔之祥巡

按李天寵旌其孝

鄭應朝

鄉賢留祀冊浦江人性至孝父歿廬墓三年生母黃氏遺疾躬嘗湯藥衣不解帶者六十

餘日及歿三年不御酒肉不聽音樂事繼母鍾氏色養備至無異所生崇祀鄉賢

倪大海

金華先民傳永康人祖病日夜侍奉不離側焚香告天願減己齡以延祖壽後祖年踰九

十乃終大海哀毀踰禮廬墓三年繼母李忠癰吮之而愈及歿又廬墓三年有司具奏旌其門

龔曇

分省人物考字汝霖義烏人年十七父病躬侍湯藥衣不解帶比卒哀毀殯葬如禮事母尤

謹孝養凡四十年母卒廬墓苦塊餽粥奠獻悲
號三年如一日有司以聞詔旌其門賜八品官

王應麟

義烏縣志明季兵亂隨父出避父為亂兵所
執勒金錢無所有將殺之應麟抱父哭訴曰

家貧無有若欲殺父願以身代兵即殺之父獲免

國朝

張密

鄉賢留祀冊浦江人順治甲申奉父避難山中
山賊忽至家人悉奔竄密負父匿叢莽間與賊

遇欲加害密呼號以身衛父受賊捶擊血透重衣
氣幾絕猶手不釋父賊感其誠相率散去父子俱
得全父患疽百藥無效密為吮其毒
始得愈令表其間曰純孝之門

傅文權

題旌冊義烏人六歲喪父事母以孝稱家貧
菽水不給日則提筐拾薪夜則製窩錢以易

粟供母朝夕母疾醫藥罔效文權叩天請代疾漸瘳後母以壽終號泣擗踊水漿不入口終身孺慕

若嬰兒然康熙三十五年具題奉旌

張德冠

題旌冊浦江縣學生康熙甲寅負母避難山中遇寇義不降辱賊以利刀扼頸德冠罵不

絕口捐軀殉之康熙五十一年具題奉旌

張明經

題旌冊蘭谿人九歲喪父哀毀如成人事母晨昏定省五十年如一日母故擗踊悲號哀

感行路既葬廬墓三年雍正四年具題奉旌

杜文孟

題旌冊東陽人性至孝母病思食鮮魚文孟臨淵號哭魚忽自泉中躍出人稱孝感父遠

出歷年不歸文孟泣請於母徒步訪父歷險阻逾萬里凡荒崖絕壑深林穹谷靡不至後竟無所遇

文孟亦以疾卒於旅次
雍正四年具題奉旌

杜時融

題旌冊東陽人父歿邊陲時融聞訃倉皇呼天擗踊冒鋒燧走萬里扶櫬南還奉寡母先

意承志孺慕終身雍

正四年具題奉旌

方應秩

題旌冊字朝音浦江人父大奎性嚴肅應秩先意承志曲盡心力母周氏卒應秩廬於墓

所寢苫枕塊哀毀骨立不御酒肉者三年後居父喪如喪母時遇祭辰輒悲慕號泣雍正八年具題

旌奉

浙江通志卷一百八十五